


KOTAVUSA VIRDA

KOTAVUSA VIRDA VESTASA VA TAMAVA IS ARAYEEM MU AYIKEEM

Kotava, tela tamefa golerava
Va ina kosmac !!

Saneaksat ke 2024


24^e otuk





V - IX-eafa decemda

Blira sareon gu nartafo gazaxo



Blira sareon gu nartafu gazaxo...

1. Tena ke gindugal
2. Sane lanise
3. Nartafa vunuca
4. Gejus selt
5. Ervo is doaliese ckane
6. Alkik is tucpastik is tujdesik
7. Volkalaca ke sare
8. Folixa is diolafa ksubera
9. Tucpastafa bema
10. Bartiveem ke blira
11. Tove ayikya...
12. Puve is deasera
13. Migeem ke awalk
14. Kobara is vieleem
15. Wida is tayaxopo
16. Wid is widavik
17. Koe yambudikafa revava
18. Glotcasik is yantakoarugasik
19. Raporxo is pradjapa
20. Dolekik is doltik
21. Moo vawa is bost
22. Moe bira
23. Levi Mialukugal



Tena ke gindugal

Levi Tolgenirapa, romafo gindaxo wan nutiyr delafo. Taneon aname Mediterranea bira, inaf welmot bak IV-eafa decemda tiyr male Engla kale Pokefa Asia is male omega ke Rhein bost kale lentefa Afrika.

Jekun gan inaf kulaceem, nartik va jowa dun dratceyed ise bak III-eafa decemda dace al lajukaiklaniyid. Voxen Roma acagiyir isen lan gijarotif gindik dum Diocletianus (284-305) is Constantinus (306-337) va tavera ke bifeem bak intafa gazara nareyed. Gindaxo gan sinafa kobelgara ecinde zo grustar nume vanpir ageltucafa ralmapa : sayakafo pemaxo zo mal-vededud isen widava gu gijarotif migaxeem zo nendad ; folkay is truminda koe tawaday zo jonkad. Lan nartaf grelt va Roma biogad : koe siaxo poke jowa zo inked lize va tuvodara is rojura zo vajged.

Soe nekev jebes seltay, Romaf Gindugal va yona govestafa tuaxasa sugda atoter. Koe talteka, tugijara va ristulafa is sayakafa ixalara, va loloon gamiafa koayka dun maldiner. Ilfitison va debala, pilkotapik va widava bulud nume va intaf taway koirubad. Deona va seltafa memiltuca tuastirbar ise va jonkawera ke sanefa kevmadara nekir.

Glupuca ke gindaxo jupar da inafa bowera loloon tir voldrikafa, numen bak 395 tuadranon zo fuxetolar. Konstantinopolis gri Byzantion vanpir kelu ke ronefo romafo gindaxo aze kali 1453 lapteyer. Taltefo gindaxo va Roma wetce kelu vider kore gindik koe Trier ok Milano ok Ravenna djukasoked. Voxen inafa kruldera zo dimpatar : bak 410 *Westgoten* saneik stan gan Alarich gazik va Roma vangid.


Idulod bak ironokaf vieltum ke anyusteaksat ke 410 en anzar. Mali konak bartiv, *Westgoten* saneik va Roma nuvon elaked. Mo idjafa viga va kaip kabelcad aze ko eda ezbad. Irubasik melajupotces ok melajugelbes ko uja ton levetiruca zo malstad.



Bagaudae drendiktum tis blay dem aeles tawadayik is exus levetirik, dilfutuson va kulaf galliaromaf vesk koe Aquitania gola artlanid. Tawayaf felisik al tir abdiwis nume va erbudik al kseldur. Ban bagaliakiraf gejusik va dikeke imizxakiraf is megrustan ruzadesik mefecuson malplatid.



Ticu folkay ke Mont-Vireux koe Ardennes gola, sayakik va mordara ke dolekafa tota moo Maas bost eninted. Bat gejusik xantaf gu Germana gan romafa rictaga al zo kselduyud kiren sayakikafa ota tir dikafa bak bat skaltugal.



Koe Le Mans, vegedura va gijarotifa migexa kum norka is rapor is dem jontik likon ivamuf rasek zo tenger. Ugota kan mada yoltkirafo gu atuk zo ticapter. Widava va ruzadera ke bifotaf nartik batvielu rotacagitir.

Moni 330, Constantinus romaf gindik is dirgasa rega va sayakafo pemaxo koe Drobeta kodisuked. Bata gijarotifa ralma tigisa kene domega ke Duna bost koe refa Romania su zo dimempar radimida remi mon tevsanda pu nartik al zo jovleyer. Za dem tol-sanoy raporaf ik norkaf swalek dere gin zo turunkar. Tigisa arte Đerdapska klisura xakuba, al zo griveduyur enide nartik mo romafa domega ke bost tigis koe refa Serbia me di remlaniyid.





Sane lanise

Ke nartaf sanetum vegungaf gu romafo gindaxo, germanafe sane dun tiyid tele lodratcese. Mali tena ke Sokasane, kev jowa ke Rhein bost isu Duna godjon dun zierdayad voxe kotviele zo dimplatiyid, dile wavdapon.

Soe bak IV-eafa decemda, germanafa tamava va teca vumeltuca ugalan. Romik pested leon dratcen nume gu nartik va int adre tugiltad : va sin wetce erbudik vilted ise va yon varaf grelt wetce vangluyanik vedgobed. Skapafi is dace arayafi tiki wal bata toloya amidapafa tamava webokawed. Voxen bata rantafa milbava gan artlakira ke Hun sane radimion en zo tuwidlar.

Bat alizmonik xantaf gu Asia gan kulaceem ke Talteka zo jekud numaze moni 375 va Europa kolakid. Tid crakef okollakisik ise oblion dugud ise trud ise zdokud.

Va deblitus germanik drikon nokied nume yatera ke konake varafe sane rem Europa rontion ik merontion nekid. Lane ton adrefa runta ilapon zo kolizid : Westgoten sane va geefa Rossia kal Gallia az Espana bulur ; Alanoi saneik isu Suevi isu Vandalen va istefa Europa jovled aze kal Espana az dace lentefa Afrika kallanid. Are sane leon koyad : mal Germana, Franken sane isu Burgunden isu Alamannen valent Gallia isu varon va int inked ; Angeln sane isu Sachsen isu Jüten va North bira remlapid numaze va Britana kereled.

Kotbate sane va zabdura va gazaxo suveyer lize koyara tenuweyer. Lanbato gazaxo tiyid sedielaf. Aro loedje slayad. Voxison abicbato va witafa soka bliayad : to toda ke Franken gazaxo isu Anglo-Saxon tiyir.

Rhein bost taper. Cugunaykafa godjuca ke fentugal ke 406 va taltefa romafo tamava gu tela lotciamafa tuwavafa jowa nore zelar. Impavantason va goaspil, aplec dem Vandalen saneik isu Suevi isu Alanoi isu Burgunden ba 31-e ke santoleaksat va bost remlanid, trumon taruteson va Mainz ralmawidava dem virutsa rojusa va za vamoo Rhein bost.



Bak alubeaksat ke 429, Tarifa moltam tigis gearte Espana va megubefa perzuca ugar. Bustapon, Vandalen van lentefa Afrika gojena nope kuluca, va int kototad. Roderaykan toteem zo kucilodayad. Gejusik is yasa do tuksa is kaip vanbedeyena koo Gallia is Espana flavawed, voxis do okol. Volerod tir gijaf voxen kewa dur num remlapira va Gibraltar vedil tir trelafa.



Bak balemeaksat ke 568, teixapa dem lanisik is edava gan jontik gejusik zo fuzoder ise va azekapa ke Magyara zo remolanir. Alboin gazik ke Langobarden sane vabdueon okollakir, dositanon gan prolburesik. Zida teyer kiren inaf ayik va warolakseem is wideem al firded abdida bulud. Va intafa kulaca pu Avar savsaf vangluyanik tu dratcesik me djujovled aze ko Italia kereleteson mallanid, kiren luvedaf taway ke Italia gan ervolia ke Byzantion roton zo rojur.

Bak 448 permik ke Byzantion gan Attila zo vedgober. Priskos ellasaf suterotik (roneon) tiyir vrutasik numaze va pintakirafa nega icdeon iskeyer. Gazafa berma tigisa idjon ice magyarafa azeka tiyir kum varon inta is zikeyena gu baynaf tcalist is kulafi tayi. Voldum aboyik, gazik ke Hun sane tir pufon bluctekiraf, voxen kot ayik va imizxa ia anamba inganafa gu moava is aka diskir. Gelukafa yerumaniky ke nafalik, dositana gan ellasafa zanisiky, va wicara tcocker. Kulupafa sielestura zanolena baskon gu Roma al zo egayar.





Nartafa vunuca

Nope vanblira ke nartafu gazaxo, arotif ugal dositayas va Tolgenirapa tenuwer. Vunuca gin gazar, kore tir amidafa gu tela ke savsaf Taltef Romaf Gindugal. Gazik xanton tis « gejkilik » sollibuyun gan gejkikem, kalion vanpid konole-rokaf nafalik dem belikafi roti.

« Berma » tir tigixo ke bowere ke nartaf gazik ise va strabapik lospar : bermagadesik is ervoliokilik. Taneon tigisa koe kelu ke gazaxo, berma dum aboyikeem adre tuavlotcawer.

Ristura is dobuluca va sutelara va jontik tegiv tuadrad, i va tegiv dure tugadian gan sutelasik is tegivsutesik koe bazaxo ke berma. Koe winka, biptik va gazik kaatoer : va ristulafi is malyerotafi is koaykakafi is sayakafi fli ksuber.

Sanefa jwa gu ilkafa tufa ke gazik re zo dojer. Warolara va rontifa koayka tir loloon wavdafa, isen gazaf rob male zilidura ke gazaf tawayeem is kaip is culiek koaykan gu gruidene sane is tazera va tal is malyerotaf sangeem is yonu gedrafu grastu tid.

Lanedje malyerara sedme romafa roka wan askuter voxen adre nartik va germanafa roka koaykad. Pona ke erkey tir dem nuyikeem ke kola. Volto buntunik va gunuca ke koridanik danedid, voxen to bantan va volgunuca gowazder. Viele nartik gu gunuca zo dostegar, pune abicviele gu altofa estera zo lanzar : loviele gu dodera va lumisasa zersara do yasa zo lanzar, isen itaya ke zersa mu gazik is kosik ok inafa yasa zo pakar.

Erkey (ikwe *mallus*) zo katanar kiren adjubera koe wida zo raplekuyur. Jotafa vuwikya ke kosik bristuna gan yasa va lantan volvartaf tizon koridar. Tubizik bristun gan yasiktum va volgunuca lasuwazder. Lizukaf biptik is strabik ke wida wetce malyeik tid.



Wazdeteson va volgunuca, bat ayik zo djuproteyyotcar. Lente buntusik, va lujafi yeldki kou reliezak narir aze gu lebat ast kevaykar. Ede gan anteyara zo umber, pune gu volgunik di zo dostegar.



Koe sutelasikafo bazaxo ke gazafa berma, tegira tir noafa. Ristus valdig adraf gu boweracka va gazaxo to banlize zo egad. Tan sutelasik kev migajeyxa, va lan tegiv sutelayan keve eluvaxa is gazon kuecayan trumon malsuter.



Muska poka Limoges buzer lize Marcus flibik va koayka fu dotar. Tari va koaykakak anteyar ise va mayesin dotasik layander. Vanimpayan gan bata iyepta, tujradik va kintaf Marcus runrojur aze va tuidulayan ayiktum lajutuvumeltar. To ageltucaf felisik va wid tir, lodam biptik ke Limoges soe tis blodik ke ardialura.

Bak bat vielcek ke 561, gexata ke Caribert isu Gontran isu Chilpéric isu Sigebert tid gorestafa. Clothaire gazik gadikye su awalker. Kare ambafa orpa ke Franc sane, berikeem va gazaxo gopakar dumedede ino co tir yasafa gadakiewega. Taruteson va metenafa keyaksera, pakeem zo xuyavar. Ton girefa toma, gazaxo ke Clovis va tawavofa tanuca drasur.





Gejus selt


Bak romafe sare, geja gan elupkafa ervolia dem sayakebik zo sopuyur. Batcoba mea tir toda koe nartafu gazaxo ugale Tolgenirapa va amuzera va warzafa gejusa gilitira ke germanafa prostewa al nekid. Tire nartaf gazik dalon tir « gejkilik ». Tove in is gejkileem, geja tir wupesisi vox dezusi uti, voxis tukulasa katecta tuke kaip koilkayan gu kevelik. Dere jontikviele, geja tir adraca ugale gazik gu dratces vegungik va int gonendar oke remblitison va warzafo tawavo gotunotrar.

Vaxe ilkaf suesikeem dem sayakebik, nartaf gazik va vexafa ervolia me deraykar. Kotviele djukukogekar, bak imwugal kiren meka doaliera fentugalon dilizer, pune va kotak ok pak ke nuyikeem ke gazaxo kan biptikeem volmiv tagar. Gejik va int oyakason gorabanded ise va intafa kiewagira remi varaf tawuk gopomoyad.

Bate cave ta kseldura va sayakik jontikviele tiyir wavdafa kiren, tadleteson va dniaskis ugol, abic nuyik va uma ziliduracka dadidyid. Acum jontiktode gazik va ant kulikeem stegenon rozeyed. Bantan va kseldura va fuzodes gejkik giltaveyed ise va sinafa rabandera isu kiewagira ravaldayad, ont rontion ont kan ziliduks ke nafeyen taway.

Batinde ilkafi is gejusi ruptesi tiki wal nuyik is korobik adre webokaweyed : batcoba tir sumefa xanta ke « ayayikafi tiki » wal jiomik is vonkik, i ke tiki adalatasi va jiomaf selt remi Mialukugal.

Raedwald Anglo-saxon gazik va fiptaf dug dem nubayotsa zikeyna gu toloy moavaf rodaf maserk pu vangluyan jiomik fawokon bulkar : batcoba tir leca ke sinafa gejusa vangluyara. Raedwald va atsa ton ayikafa xatcaxa is prostewafa Sachsen lioza diskir. Va gamiaf gazaf woz moe taltefe bade dere diskir. Inafa azilafa sugduka roneon al zo kougar ; roneon jotaf zanisik va inafa kuftaga isu prosil gir.



Nartaf okilik va fiptaf dug (2 ik 5) diskid, i va dug dem nubay zikenaf gu moavatoaz is wikoba isu dugak. Ar letapegaf dug soe tid dem maserkaf dugak is moavafa nendaxa. Rokabuna kuftaga (6) is gejafa kuftaga (7 is 8) gan Franken gejik nelkon zo faved. Tazuk ke kabazilxa (9 ik 11) tir gedraf : dene Langobarden sane ke Italia dile tid dem trek, voxisen alakirt ke lanyona demikirafa kaba ke Alamannen gejik (11). Turestanon gan alizmonafe sane, mali VII-eafa decemda, sudot (12) ko Talteka zo koplekur. Miltior ke okol (13) trumon zo ziker : tulon gama ke bat azilaf miltior ke Alamannen okol.

Kabe agektucaf sayakaf tantazkot, ervolia ke konake nartafe sane tiyid ton yona solwickafa cava kare sane is sare. Hun (1) saneik isu Avar (2 is 3) tid asiaf alizmonik is katcalaf okollakisik. Sinafo gelukafo ervo tir tra : ant sin okollakison rofaved. Goth (4) saneik isu Alamannen (5) isu Langobarden (6) isu Franc (7) nelkon tid lanis gejik, kore kan okol rolakid. Gilton ant okilik va nendas ugol diskid : atsa is anamkaf prosil voxis burkon leltor kum azilaf imiz. Dulfusa imizxa tid abrotcaf dug is trelaf abalt is kuftaga is kaba. Dene Franken sane, gluba (7) dem azilxapa tir leca ke dirgara.

Hun okollakisik,
V-eafa decemda

Avar okol, VII-eafa decemda

Langobarden gejik,
VII-eafa decemda

Franken gejik,
moni 500



Avar okollakisik,
VIII-eafa decemda

Goth gejik,
V-eafa decemda

Alamannen gejik,
VII-eafa decemda



Ervo is doaliese ckane


Ervoara kare sare ik sane ik seltafa ema ke gejik arapeniweyer. Tela ke Franken saneik isu Alamannen isu Langobarden isu Sachsen isu Anglo-Saxon isu Avar tir grupeckena kiren bate sane va gejik do ervoem gikotawayad.

Dilfusa ervoara vas kuftaga is kaba is dugap is abalt is tra ruldar. Franken gejik moekote kan kuftaga kalimoni 600 doalied. Kaba tid ton jontika korinda : gamiafa dicima ke nugagejik is lobagafa kaba ke okolgejik is gluba ikz-. *Angon* gluba tir vuwafa gu romafa *pilum* glubapa ise gelukafa rokabuna imizxa ke Franken gejik : inafa azilxa tir abrotcafa lidam ridja kum inta isen otsa tir kandokoraf uul. *Spatha* dugot gan okollakisik lidam nugagejik zo diskir. *Skramasax* wedok tir gamiafa tangabexafa abaltinda ise vanpir logubefa imizxa bak VII-eafa decemda. Tra luxeon tir gelukafa imizxa ke okolgejik ke alizmonafe sane dum Hun is Avar.

Nendasa ervoara ke nartaf gejik tir rifa ise gitir ke okilik : azilafa atsa zikenafa gu iyekot is leltor besanaf gu azilaf kralk is gikoburen mal Roneka, is anamkaf prosil kum inta dem azilaf *umbo* fey is dile zikenaf gu iyekot.

Bak Nartugal deblamesa geja sopuyuna bak Savsugal abiceke wan krulder : nelkoteem wan zo gruper numen ruzades tralt dum drimot zo grupepud. Meldap tid rifa : to deliv ok xag kan akoyesa keska loviele tid. Kali VI-eafa decemda, meld tid gojaf rand ton ilkafa doaliera. Kaikion vielu meld vanpid ton vura, pune ervoara zo kastar ise zo tutantazukar. Ant Goth sane is Langobarden is Alamannen is Vandalen va ageltucafa bagafa okolervolia banugale dadid.


Moni 430, meld tir noaf wal Hun gejik isu Burgunden. Poke Worms kenrone Rhein bost, vadimefa ervolia ke Burgunden gan Hun okollakisik su zo akoyer nume durulon zo vajiker. Hun gejik jontikote tcekad aze va Burgunden gejik kan usta is zdoka dilfud. Guntarius gazik zo aykar.



Kabura va *francisque* kuftaga tisa crakefa rokabuna kufta ke *Franken* gejik tir wavdafa yamba nume jontikedje zo goraver. Tire, kuftaga zo kabur numaze koo mid banger isen gabexa va jala rotazer ant ede ina arte lana solumacka kalvekafa gu kota kuftaginda tigr. Acum bak rand, gejik va soluma riwe aptadason gomaluindiner enide kevelik di zo artnir.

Dizvepenon gan bagaliaf is grumalyopas gedisik, lokiewaf okollakisik ke ind va fiptaf okol ke gazik isu gejaif viklud. Bata gazafa okoltcema tigisa poke Tours tire tir tana losposafa ke *Merovingen* gazaxo.

Bak 539 Franken ervolia va Alp rodega su remlanir aze va Italia kolanir. Vabdueon Butilin dacik isu Leuthari okollakid. Gan Theodebert *Merovingen* gazik zo stakseyed enide va Narses jadiwik ke Byzantion di doalieyed. Sayakafa sipuxa dem Franken nugagejik gan okollakis okilik zo koxutayar.



Alkik is tucpastik is tujdesik

Sareon gu Tolgenirapa, katalikeva dalon tir widavon tigisa ; loa widava tid tujradaf widot : banlize wevala dayker lize tujradik is gertikeem gitujborud ise va tubaerdara ke ujaroti (ailkera is tinefkara is kurera ikz-) xoled. Lotode tawaday guzolkevawed. Soe adre kristeva koon zo tuyavar numen uja koe lozolonafa widega zo kolnad.

Lane nartafe sane banugale tid zolkevafe ise va jontik lorik wan folid, voxen yonare va kristeva ixam al dewelduyud, i tulong Goth sane isu Burgunden isu Langobarden isu Vandalen. Wori va rictula ke papik me malaskid kire va ariuseva al vanikatcud. Bat tilbuf enilt buneyen gan Arius gertik moni 300 RGJ- va loruca ke Kristos meuyur.

Mali xanta, nartafu gazaxo vanpid tawavo godeweldeno gan tegira ke ujaroti. Zultafa deweldera va lanyon sersik gan tujradapik, dum tela va Chlodovicus gan Rémi tumtik ke Reims, va deweldura ke varafe sane (zolkevafe ok ariusevafe) dile di nekir. Bak VIII-eafa decemda, gazaxoem va kristevafa alka al yoter. Soe jontika zolkevafa ksubera koe bumafa gola lapted, lanzana gan tujradik bal nepal belon gikatanan.

Yone decemoye tujpastaxe zo zabdud numaze va tukristevara zolonapon yordad. Jontikbate tid grabom ke eireaf tucpastik dum Columbanus tumtik isu Gallus. Blikeson ok vayason ok nubakobara, tucpastik va ugal kereled nume va deweldura kan tula zilina is pomara pu tawadayafa sanelia kid.

Ton lebafe nugeem is tapeyes lukast is tcoteson, Walfroy tumtik tice briva kolnayana moe lana venta ke Ardennes gola poke savsavafa kudja va Diana va bartivtumap gitiskir. Batkane i Langobarden vuidanik va evangil neva tujder nume va zolkevik gu diersa aranamar.





Forteyotafo alto ke Bonifatus Tumtik is dositiktum moe lana piluda ke Germana kene North bira dayked. Sinafo pemaxo gan frisikaf blay su zo dilfur. Arpumason va bli, alkavuidanik va bate sane altoz deweldeyer.



Lente aboyikeem ke Northumberland gazaxo katanayan koe berma, toloy pulvarotiik va sint liked : tan zolkevaf gertapik is Paulinus vuidanik. Erwin gazik tire al abduplekur da cenesik va bate manafe toldoalie, va tela alka ke dalintafe sane di gorar. Sedme boy ke lotan, Paulinus gu lokiewik zo krupter.



Tucpastaxe ke Nivelles sugawalker : lana alkikya su awalker. Arti bregara, ezgalday van Petrus Tumtikye uja (roneon) vanlanir, i van alkikaf naboxaxo. Alto koxawayano ke awalkik zo ksidar. Darpe gilitra ke bane sare, tucpastaxo vas toloya uja ruldayar : Ketikya Uja tisa dalafa uja ke alkikyeeem (isteon) is Paulus Tumtikye (talteon) mu gertik dazanis va tucpastaxe is alkafamik ke vema.

Zolonafa fipta koe wevala ke Orléans dilizer. Bak bata 511-e ilana, nepal va tujradik ke Gallia katanar. Arianus gertikeem ke savsafa Westgoth Aquitania olgicuyuna bak 507, va intafu tilbu kabdue tregul fawokon grivogar. Gertik va Uja pirileson saadad ise va yotera va katalikeva etimad, i va alka ke Merovee gazaxo mali ailkeri va Chlodovicus.





Volkalaca ke sare

Kiren kotcoba kotvielon adre tulatorawer, pune tena ke ugal ixam tir furefa. » Va to bat bendeke koe naboxa ke Mellegaude eceyik awalkeyes bak VII-eafa decemda koe Poitiers robelit. Dum jontik milsareik, bat ayik gan volkalaceem ke intafe sare zo pedrayar. Dum jontik artan, va larbudara va tena ke tamava kan bancoba krupteyer ! Arti decemdafa vuca, soe godostet da nartafu gazaxo va loe ok lorotafe egale dam telyone tcalayase va Savsavugal ok Klaamialugal nuve me grupeyed. Wori, tuwavafa skaya va pizafa danexa tove sanelia anton dadisa va twamidura wetce robap nekid. Gulaf muvacek ik tizaf onotcacek ik abrotcif tapcek voxik konaka rodafa safta va direfa warolara rotplekud oke dace vanmecobad. Laizafa tolgenira ke jaya ok bonolafa konakakola dere tid crakefa. Kotviele di tir to aelakola kiren icrileks tid axaf isen tor abiceke ok roton pridud.

Battode va lanyona yasa jovlesa va merosinkan rumeik wit. Akola is awalk sotid ra ke vieluca ke sanelia fereon aelepasa is megrupesa va konafa tipufa vexa. Lojotaf korik isu guazaf tid taneon icdes. Isen lorotafe egale tid keftakola bassaneliasa va varaf golatum isu amatrastu isu brinkakola.

Tizura dere tir gubefa. Buxara is aytara nope barlipaf lidam gedraf famint ko dace uja tid unaykafa. Oluiokem kan ageltucafa yasafa jaxadarapa gitulur. Geja luxeon dun dilizer : koboda wal yone sane voxis moekote wideyafa geja dum koe Gallia ke Mérovée prostelay.

Deblamena mali toloya perka, Comminges widava va ervolia ke Gontran gazik laspedon acagir. Leudegisele dacik ticu okol va milk bristur. Pomanon gu drimotap kseayan moe krafol is besayan gu azeb, sayakik va tan tuvel ke widava lasutitplatid. Ticu migexa, sayakik va raporki mo deblames foalk titosiped ise va koteyan violt is lembiewes sum malgimad.



Ladavagagis va balumayan raporaf lukidoy solparsas va alkik gu yotesik, gertik dakter da koblisik kabdue tuvel ke uja su zo jovleyer. Tolonga va int atoeer ise djuprogaar. Ede arti sanku pintik me co di zo kretur, pune di vanpir levetirik ke tubronazbeasa yasa.



Bak bat mielcek ke 585-e ilana, Cité ewala koe Paris anteyawer. Fird mone Zama su tozuweyer. Van ara domega kalion galbuwer isen mecoba rotazavzar : kotcoba di zo vilar, vaxe Saint-Etienne wevala is loa uja kolnayana kum rapor.



Warolara tiyir rotafa numen icrilekseem re al zo pusker. Aelakola tori aksattumap gazar. Koe aala, trasitison va zae abicote kogestutuse va yasa, ayikyve va sid fasiar.



Flam su akeoyer kiren Pretextat tujradik ke Rouen mo deba atitsur. Bak Paska tujbora, winon gan tukultana disukera ke alkikeem, gan lantanye su zo xonukanubemar. Lagazavzanon gan metan, pisonasik ko wevala yater.

Bopi ke meftava laizon zu buber, kowundason va Tauredunum folk koe Swiza is oblasen va krantoza ke Rhône bost. In kal Genève su divdomawer, ilbureson va konaka varafa wida. Jontik irubasik zdarion me rovoyateyed. Bonoleem xonukeyer isen warolakseem zo vanmecobayar.



Folixa is diolafa ksubera

Kore folixa ke warzaf deweldenik gu kristeva tir blifa is puraafa, nume savsafa folira loleon laviafa lapted. Koaykason va int, ujaroti va grivanovana folixera kle golyumar lidame va savsafa ksubera zaenapafa gononaler.

Koe tawaday, irubasik va lanyono baerdaxo wan payud : i va klita isu aal isu meftava iku raporey. Adre, kristevafa alka kan tegira ke gertik is alkik is tujdesik va batyono pilkovaxo kodigir, i va xo vanpiso befoltaxo. Lolize, zolkevafa jora wan zo fiptad, i jora dunusa va telyona ke Savsavugal : fralekoda ik visikor ke Tael ik bartivap ke midura va tawa. Ujaroti va batyona ksubera adre lasutukristevar, ikarundason gu alkafa jora.

Diepileropa wan zo vandroapar. Ujaroti lanzackar tode ina gan diepilesik zo ksuber, voxes va roka bibesa va tumtik kan blikera ik baerdafa neva mu int ickriler !

Va vidura va diolafa ksubera pilkovon kivar nume dun lyumar, i va ksubera slikviele deokasa va ayafa gloga, sedme int. Va kottan uculen gu skedara va Oretlik dere lanzar : i va diepilesik is diwedasik is diwik. Sin jadion zo naked ike zo anteyad.

Kristeva gu zolkevafa laptesaca worikle zo ksevar, isen lana remi konaka decemda di levblad. Bregasa ksubera pilkovon vrutad : nela is xa rundayana poke awalkik, is blotaf firviks is bregzil voxis yasafu estu moe naboxa.

Tumtikafa senteja dile favena wetce risucku vas atayera loloon galbuna mukad : gu fraskesi roti mbi gad, don varafa naboxa ke tumtik voxis lava pokeon traspusa.

To jora koe Autun tir ! Seotatason va aultoves warolaks, irubasikeem ke widava va kudja va Berecynthia lorikya koo vemafa taya is centaxo gestar. Ina mo jaftolafa eda zo rundar. Cugtan anameon dankad ise stuted abdida bak mielcek gaveon di durgud.






Bemuafe, bate ayikye va guazikya nuve grupabdiwise va enekeugal aun ruper. Va tokcoba ina koe guboy ke teyak vion kalizina kan peya fu belir ?



Bata baroya ayikya ke Paris gu bliranteyara zo lanzad. Fredegunde gazikya tu yerumanik ke Chilperic va sina gu diwura al lanzar. Gu muluftera ke Theodoric jotafe nazbeikye kan diwedara tublodar.



Katanas remi barka kene omega ke baerdafa uzda poke Helarius mefta koe Auvergne gola, tawadayik va jontik firviks ko lava titosiped : i va beg ik bluda ik sebeka ik tayi. Va bonol dere wetad.



Mone Benevento koe Italia, bat Langobarden okollakisik va lana abdigadafa prostewa malaskid. Pokotcepason, va gluba vamoo epita kadid ise va sulemafa almaxa rumdayana bene baerdaf aal laremrud. Azon va soltiolteyeni ki di estud.

Jontikviele befoltik remi konak bartivap goked abdida va naboxa ke Martin tumtik koe tama ke wevalapa tigisa poke Tours artlanid. Wickitinon, raporafi elji moe cag tigr. Milton gan gertik tantanon zo nyaped aze va oblarot kum inta remlanid. Kottan va rapor ke naboxa ok besas dualt djumuzar enide bas Martin tumtik va mezara iku fraskera di seotar.





Tucpastafa bema

Jontik rumeik ke sane koe to bema ke adlutaxo va geaki ke grupenuca raved : gertik va belira is sutera taver, is moekote vosent dure gotolkalin. Ar jotaf rumeik pu tucpastaxe kotron vajuletese gan gadik zo nafed. Tucpastamik va taneon verta is vexa is vegera az pulviropa is dank is baerdaf krent is jobda raved.

Jotaf nartaf oluik amidapon zo gaad : ton utifa is sayakafa ksubera. Vundaf dank kotgrupes va sega ke cosaf gradilik mbi taved ise gu malaskira va tula zo koldad. Grutesik vanpid zanisik va sersik numen bati fli va jebesa ristulafa ik sayakafa klepa di fenkur.

Nope akeoyera ke romafo gindaxo, sanefa bema griawid lize feliik va pulviropa ik uiveura taveyed. Pulukafa araya mu gertikaf ik tucpastikaf ik oluikaf ontinuk banugale re zo icriler, kore favera va Latinava tujadiawer.


Yasapa vey romafo xanta va pilkovaf suterotaf tavesik pu nazbeikeem tire wan tiskad. Wori, turestana gan ujaroti, anamtavera betawer : trumara re tir tuontinara va gloga ke tavembik van Lorik ta ugda is vegera, lodam tazukara va arayakirik.

Pulukafa araya kevaliena gan ujaroti, va targucapa soe vider. Mali VI-eafa decemda, ujaroti va warzera is amuzera va baerdaf krent is jobdafa neva is tumtikafa tanizva bristur, i va krent dure malsuteten is vayan koe zolonaf tucpastaxeem ke Talteka.


Dum bak kot idulugal, Valerius Bergidensis tucpastik va intafo antoraxo koe Bierzo koe Asturias gola gu bema al artazukar. Remi konaka safta, va jontik rumeik ke gola nafen gan gadik emuder. Sin va belira is sutera mbi taved. Vapey kum inta besanaf gu sebeka wetce nuka kan edgardaxa zo gretcad.



Kotvielon, bat tucpastik ke eceyx ke Corbie va konak bartiv keve bugi tiskir. Radimida va eltay ton tazuk ke tacukaf sulem mo migajeyxa al conyukar, pune kan sizuntasa kseva ewavar. Mecoba tir listarsafa ta yunkera va bat warzafs kudaks va neva ke Augustinus tumtik.



Munegisile va boltekafa nokexa juikeyena gan selasik yawar. Bate selase de keve keik elimon zo gozaler enide kranav keskoton di zo kiazar. Boltek gan layaf trigay is azilaf imiz kalican gan leltafa refema keve guava zo raxivar.



Leo Augustus romaf gindik ke Roneka zo tuvaleapar : jotaf Theodoricus tir grutespes ravesik. Va Flavius Ardabur Aspar tavesik dere sendar. Sersafa gaara va diref gazik ke *Ostrogoth* sane tis vrulutanik koe Byzantion mali anyustdafa klaa tir moe joyanya.

Kiren gadikeem va Lorik gu rwaveyena fuxa djugrewad oke va alkafa gaara opelon trumad, pune va batyone velikye den tucpataxe al djukurundad. Blira me tir olgarsafa tove bat rumeaf tucpastik kiren deases gemeltany radimi blikera ik vayara ik dankara tid.





Bartiveem ke blira

Dum abdion sareon gu Romaf Gindugal, yaso-kilikye va belikafi roti tove intikeem rokar, i va roti dem rokara va bli is awalk. Tokdume blira ke kottan gan kiblara ke gadikye zo gotur. Bata kiblara gan dulap ke yasa zo kredad, i ke omavafa zona ke selt.

Rumeugal sotir trelapaf greelt bak blira ke jotaf nartik kalion vanpitis milgik. Gaan gan gadikya ok sinkasikya, rumeik va bonoltum gisur oke va bema nobar ise va tizafi uti is vefaks koe divak albar.

Taneafa milguca ke yikye mali san-alubdafa klaa dene *Burgunden* sane isu *Englasachsen* zo fiptar, is san-balemnda dene *Westgothen* sane is san-tolda dene *Franken* : to klaa ta zilira va ervo dene taneakaf germanaf selt tiyir.

Dene zolkevafa yasa, koblisik mali anyusteaf viel radimi koblira zo yoltar : gan korik fawokon bures va in kal kolavaxo.

Dene kristevikeem, ailkera bak sardugal loviele zo skur. Jotaf kristevik gu xantafa troba zo tcater ise zo kumzilir aze va povakikye banvielu dikir, i va povakik ikarundatas va gadikye tod awalkera abdi klaa.

Kurera va ageltucafa kofira ke jotafe nartikye va milgikaf selt tcalar. Aguntara tisa zolonapafa abdion dilizer : toloya yasa icde trogarneem ke kurerafi zubi va sint dotrakad, dile arti dolebarapa. Pestaka ke aguntanikeem rion zo torigid, i ke moekote yikya tisa loviele jotapafa. Vidiugal kaikipon dile dilized. Dene kristevaf selt, moi kuresa kumzilira ke gertik, yikya ko mona ke warzafa yasa zo star.

Leve krenugafa disukera ke yaseem, Amalric is Deoteria va prostewafa kutcara pu sint ikazilid numen vidia tuwinugar. Nope giltira, yikye va dilgavaf geltak anam gelt ke yikya su plekur. Va roga is abica brekla voxis... guvengeem pu ina al firvir. Va filav kaatoes va lecafa lustera va aguntanik, pu direfe ikagadikye dere al bulkar.



Ba kuresa kumzilira, Chrodulf is Chidegonde kabdue gertik badenyed ise va nuba pu sint zilid. Batedje tcicesik va muxelkafa ploda vamo sinafa taka sotced enide sinafa kurera zo kumzilir isen blira di tir kalafa.

Garimund su tir san-toldaf, ba klaa ke taneafa milguca dene Franken sane. Nope orpa, usuk taneatomon zo gaber isen bifa dene yasa daavon zo kapar.




Eulalius va Agnechilde il xida koe Lyon al djukukigder, lizu gadikeem va ine poason al rundar. In va liza al eganyar. Ba gazda, yikya va dilk boroder aze pomanon gan dositye mo okol iskuson buber. Sin lowiluon re gonotced.



Lort ke kurera su tenuwer. Fuzodenon gan daavafa is loras teixa, gadikye ke Childegonde va ine ko meem narir aze sin va pikay ke inafa warzafa mona remlanid. Rape orpa, usuk ke kurenikya tid ton tevoy tronk.

Jontik sardik bak dareviel abdi Pasca jora. Kal ailkerak gan povakikye zo dositad. Kene kures blet va int basvaged aze baron kolavad abdida va puntastudiera gan tujradik mbi kazawad. Azon va batakap breltagem kavaged.





Tove ayikya...

Kore ayikya wetce monokilik is yasagadik yordapar, pune selt is mweem va gamiafe steghe soe aykad.

Viele va xida me kofir, pune ayikya vey nartafa xanta zo kurer viele tir jotapafa, isen mana tanara cugtode tir merosolelana voldum bak romafe sare ugale solyerumara nope belcelafa finera kruldeyer. Bata adrafa bogruca ke kurera va dokotuca ke yasa ozer ise va kurenikya volfakon rozambena gan kurenikye soe nendar. Tire koe cugo nartafu gazaxo, bof ok bedablafl digiks gu kontanya me zo rokonoler. Lokiewon, ayikya va abica xa « konoler » : i va vage ik roga ik nela.

Lantanya ke nartafe sare wetce gazikya ok eceyikya va yolt koe lzva soe iskeyed : nafalik biliton linulayas ik vundon tizaf dum Fredegonde is Brunehilde dene Franken gazaxo ;

utcorafa is stropafa ayikya dum Clothilde ok Bathilde tu kurenik ke Clovis I is Clovis II Franken gazikye ; gijarotifa is crakena eceyikya dum Bertille ke Chelles ok Theodechilde ke Jouarre ok Radegonde ke Poitiers.

Kota ayikya va vageem is ingaxeem tuzolonapar. Kotafe sane va intafe ayikyafe cave towase darpe ugal dikir. Kore Westgothen ayikya oku Langobarden va Franken saneik kureyer, pune va nelkafe tadle ke intaf « cosaf » aboz remi blira vider. Gu abic beituks gu lizukafe cave rotukotrar. Dum ota ke ervoeem mu ayikye, kuluca ke aboz is rogeem va runda kerelena koe selt mu ayikya vadjer.

Koswana gan Eloi tumtikye modovayane gan tan aboyik, Bathilde gadafa gazikya tu nyobrik ke Clovis II, va intafa kulupafa ingaxa dem moavaxa mu wawik al djukudoler. Winon gan Bertille eceyikya ke tucpastaxe ke Chelles lize buluyuson re blir, i guazaf nafalik va fideyena kruja atona gan jotafa alkikya trumon rinder.



Sareon gu nartaf gazugal, ayikyafe cave tir amidafe kare sane is arapeniwese kare sare inde joxara va naboxa razdar. Vaxe ronekafa tamava (5 is 8 is 9), gem is gratca leve bade zo diskid. Ewazalt ke aboz is femla dile tid zikenaf gu moavafa fidexa (1) ok mardema (6). Omexa gan jadayok zo rogiskir (1) solve vukuda gu yantafa kenda zo fenkur. Nouli (6 ik 8) is lorion amoto (5 is 9) va usuk gid. Italk mu kurenikya jadion zo ickriler. Oblakak is flek is xiz va ingaxa anton yordad solve gerga loon tid favlafa : budera va gem is lioza. Anamba zolonapon zo torigir ; filav ik wed ik tselka ik loitesiki ik yoneca nela wetce falak loviele benon zo rumkad.



1. Franken, moni 600 RGJ- ; 2. Franken, tozi VI-eafa decemda ; 3. Gothen, V-eafa decemda ; 4. Westgothen, taneafu acku ke VI-eafa decemda ; 5. Slava, VII-eafa decemda ; 6. Alamannen, moni 500 ; 7. Alemanen ayikya isu rumeikya, sizi VI-eafa decemda ; 8. Gepiden, VI-eafa decemda ; 9. Hun, V-eafa decemda ; 10. Frisen, tozi V-eafa decemda.



Puve is deasera

Nartik gu jontika gedelaca ke romaf seltay kalion va int zaleyed. Germanaf jiomik fereon inkeyes koe berma ik tapegafa garia ke abdifisik va lanyon virt dum texomba ik regayomba ik guyura vanikatcuyud. Jontik dum Childebert Franken gazikye is Theodoricus Ostergothen gazikye is Ultrogotha Westgothen gazikya va cuisafa tcolesa matela albason senud. Luxe rumeik, sinafa vefara isu vefasiki tid prostewafi : onda is vipa is niskama is bragoda is sulemaf kudjot ikz-.

Disukexa jontikviele tod alkajora ik kazaxo zo firvid. Wenyafa ok zatcezasa zirsera zo rowid isen dank ke ezlusik vandositan gu drora ok fwak zo terektad. Lexa is dank tire tid yone loon karolane puve. Tujbora is vidia is caxa ok dimlakira ke kon ceneyes gazik ton lexa dilized.

Bata exaksara kotviele tid yonta ta sanefa felbera (tcunke ok lorot) edje pakesik gu centeda ik lexa ik donafe stutera va int tuizakarsad. Ujaroti va batyona divdomara lanzar, vox loviele giopon.

Tizafi uti va ayikye is yikye sked. Tulon uson va okoluti is pujeruti, sine va uzera va tuwava kaaneyad. Koe dimempayan savsavaf fult, jontikote saneg va snavolafa doaliera puvegur.

Soe, gelukafa deasera ke milgikyeem bak bet saz wan tir tcabaneropa : kan dona ok flaweza ok vulteson ; jekura va wivga tir zolonafa leon dam molikera va govitol is puvegura va wazdera va deksuca is takreluca.


Ulidebaxo koe Paris jontikote tid, voxen vugo tid sposafu leon dam telo ke Gibethrude koe Cité ewala. Dugafa centeda zo zanoler. Atelaf azekor is gerinseks ke Seine bost ke tilikya gan daavaf ganeniktum zo albapad.



Tcabanera va wafibol tir wupesisi uti, moekote tode kan akricu zo ur. Govitol kabalien gan laitesik is onkan gan krungaf is mecuesaf vakol, va tcabanesik su vajiker voxer ben kaba delon gina va int kokoar.



Moe savsafo dokalixo ke Barcelona, baroye mekobase ayikye kan akluva kum ebeltaf rapor dun ombud. Va sin moe tcegak gretcyan moe tilmu kalion arplekud. Moneon, rumeik kan leltafa vipa iste goba vefad.



Savsaf romaf fult ke Metz fliton zo dimsenuyur. Lana vefara mu Chilbert gazik is aboyikeem zo ksbed. Banugale mea tid volumnafa doaliera ke xangousik volse zugafa lyumara va govitol. Leve skesa disukera ke tari, rupol gan yatkaf vakolap zo dilfur.

Gelukaf kakevexo ke jotaf *Vandalen* oluikem ke Carthago moe Byrsa venta tigr. Banlize yikye is yikya va gemeltap ke prilara is kranderale ile gadikeem tiskid. Zanisik jontikviele zo stakser enide di dimdenlanid.





Migeem ke awalk

Awalkikxo dive widava is wida volsu mone tigid. Naboxa moe sidwelma gu raporaf atcom oku karnizxomo gubeon zo tcalad. Tawafo juro ok kona tcarma vamoe yupxo ke zolkevaf okilik dile tid : konakban dum Englasachsen Raedwald (kotawayan koe Sutton Hoo moni 630 RGJ-) koe intafa tota rape lentekafa prostewa dace zo kowundayad. Kela kene talturonafa lya jontik-viele zo suxad ise sinton zo vanconyad. Poke widava az adre koe tawaday, naboxa aname uja isu dace koe zo loypad. Uja vamoe naboxa ik senteja ke awalkexik ok tumtik zo kolnayad numen jontik awalkik cugeke pokeon tire djukudayed.


Naboxinda tid jontikafa ise kare sane ik sare ik seltema arapeniwed. Alto drum tawa koe nomulk ok ko caxamawa vegduyuna kum azeb yaxayan gu raporki zo rodaykar. Elji koe widavafo awalkikxo vaxis gola videyesa va romugalafa prostewa dalon tigid.

Franken saneik isu *Alamannen* isu *Langobarden* isu *Sachsen* is *Englasachsen* va awalkik do lolistafe blucteeem is yoneca ilkaca gikotawad : is do roga luxe ayikya vox ervo luxe ayikye. Trig dile tukotrayan gu blot zo lopekud : awalkik kuranir da kali naboxa do sugdeyeem ke intafa ema di zo kotawar. Ar cos dum *Gothen* is *Burgunden* is *Vandalen* va manyona orpa unsuyud.


Caxafa teixa va awalkikxo poke wida artlanir : irubasik ke Morken koe Rheinland gola va bregara bagaliafa gu inafa ema pu okilik al ickriled. Rembureyen moe ksud gan yon sagaf dositik, awalkik gu intaf lolistaf blucteeem zo kavageyer. Inaf prosil mo alto zo aykayar. Tane nazbeikye va inafa atsa diskir isen toleafe va inaf dug. Glupafa kela pencayana gu azeb al zo egar. *Franken* okilik koe delaf kold kum inta fu zo rundar.



Awalkoda ke awalkik mo teyayana intezba su zo daykar isen yasa tcoker. Altoguboy koe tawoldaf trig zo kayestar aze koe awalkikxo zo kosuxedatar. Anteyara valente Germana is koe Engla anton wan zo ksubeyer.




Sareon gu *Merovingen* gazugal, tigixo ke naboxa gu raporey ok zikayen atcom jontiktode zo tcalayar. Dace dile, gentimrontafo karnixxo dem tanoya ok toloya runda zo vegeduyud. Awalkikxo kare vertaf zovdom zo voned.



Arti bregara, dodelik va gamiafi raporafi elji ko kela suxayana ko sid ke wevala ke Saint-Denis trumon titplekud. Nekev atuk is noxodasiki, sopura tir gedelafa. Kela gu tawa radimion zo adoneter isen tilmueem gire zo rundayar.

Nope lana zolkevafa romafa prostewa dalon laptesa koe lentefa Afrika is Espana, ba ilanuk ke awalkera yasa ke awalkik moe naboxa va int katanar aze va caxafa estura fiptar. Naboxa leve trilnafa azega pufon zikayena (*mensa*) vawale blaganaf starkot tigr isen ganenikeem ta lorotara va int inker. Estuson, kottan va ulida pu awalkik lecon firvir, gimason va centeda koo artig nuvadjes va naboxa.





Kobara is vieleem

Lo irubasik ke nartafu gazxo tid tawadayik olgon is porton blidas va tawa is blis armoron gu cadim. Koe germanafa patecta, abictan va tolkrafolafa ziita dem azilafa loyta impana gan jaftolafa tola dadid. Arlize loviele prostewaf dezark ik dace genva zo faved. Azilafa xeka (dolistesiki is bupra is kufta is leakom ikz-) tid riafa nume trumon zo kiewagid. Tawa gu *marne* rapor is bonolafa cielka ik divluja ke zveri varteni ta bata malsavera wan zo tukular. Voxen tuminjara wan tir dalaf mergil tubodas va sid : koe gola valente nartafa Europa isu varone, likap ke tawayeem remi tanda fuxe tola goatenon zo tilder.

Zaipa is utsarka tid lonobafa midura. Vebaltara va jontik sopusik zanies va bupra diner. Ksent zo ralakud ike gan bonol zo nugaped. Olk leve awalt zo turodar aze darpe olegara kan yasafa gatcewa ok lopokef lavarn zo kladar.


Vartera vonewer voxen bonoleem ke mialukaf tawadayik vas namulol is deaxol is bulol moekote ruldar. Jaftola is okola abicote zo malestud kiren bat bonol tid tciamarsaf ise wetce impokasik ok buresik zanudad.

Nartik dum romik va centa midud ise va centedanya albad. Moi warolara, cente koe blet ok vaalka zo abdaraykar aze ko plom kum inta zo plekur, i ko milunt dem azilafa ivamuxa is koak storlayan gu violt. Blatafa vartera tir yavapafa kiren kolt tir antafa favena bota solve sebeka va epura va tsoka is raki zanudar. Rob ke bira dere zo malsaved : grocelafa onara is maltioltera va bireip.

Gridubura va aala tir portafa vox adrafa kobara tode welmot ke romidun tawayeem zo golaumasir. Tawadayik va aal balied ise va soltawara va kros mu tucpastafa belunda ke vegungafe eceyxex digise va bato aalxo eloded.



Muvugal toz dur. To cadim ke faytawara tir, abdi taneafa noldara. Kosidatason va loyta kum inta tuolgayana kan tey, ziasik va nubelt ke dezark gamion winder. Rontafi bumi ke bata opelapafa ziita ben jaftolaf noleem kan miremba zo titickar. Ilkabusa faytawara dere zo sopur azen bourgeem kan karn kum inta impokan gan okol zo modivatcer.



Lava ke kuksa kan ferast zo danter nume va setcakiraf krafolap ke lavarn tacer nume va riezoteem kum inta is raporafa gatcewapa dere kolizir. Regelta moe titickafa gatcewa zo kayestar aze zo koeyeltar.

Onara su zo tir kiewafa. Onasik ke Guennoc ewala kene lentefa krimta ke Breiza va tota mo piluda impad, i va tota dem walzafa cewa. Va kita kotrafa gu kabay basvajad : i gu sembiz is ganjuk is ricolam. Va onasikafa wida vawale feja kum raporoy is dem raporxe dem koridafa kepaita sumuon kozwit. Lana tozela gri divgabeyen raporey tice patectoy tigr larde lo breizik re tid kristevaf.





Wida is tayaxopo

Radimida nartik va winkeem ke savsafo taltekafo romafo gindaxo al tolgenid, pune koe levrotiyino tawavo va int inked. Va glupafo tayaxo pu int kserad aze va warzaf oluaf ontinuk jontikote toz tazukad, i va ontinuk tikis va tawadayaf pilkot is kureson kagluvas va savsaf romaf oluikem.

Kot gazik va dataf pilkot digir lize va koayka maltiolter. Bat midun taway is aalxo is vaykaxo is dubuxo va « gazafa koaykaka » tadled. Azafa zilira pu ujaroti is oluik va ina adre di kastad. Tawadayaf tayaxopo (*villa*) vas toloya pakava ruldar : taneafa (*réserve*) dem lokiewafo tawaxo gan pilkotik poman gan levetirik is kuban dodelik rontion zo saver ; toleafa gu yasafo tayaxomo (*manse*) zo solzarteyer ise pu graltik zo lizukedar, i pu graltik loviele nuyaf vox danus va pak ke warolaks is yoneca kobara pu pilkotik.


Enwe, abico tayaxopo tid ton tanoya belca numen tawaxo tid tcastafo. Dure laumasison va tayaxo, pilkotapik va nuyaf tawadayik imaxus va sinafa rojura iku pomara meklabuson azreged. Loloon iskedason va widava, va siluksilukon va koto tayaxo worad ise koe tapegafe sokexe jonvieled.

Tawadayik koe wida dem intaxe zavzoted, i koe wida tisa ke tayaxopo voxok meruptesa. Lozolonafa wida (*vici*) loote iexam kruldeyed bak romafe sare, dum loo tayaxo. Tigisa kene nelkafa vawa, va tawadayaf widotam dem dolexo is adlutafo uja yordad : koayka koeon zo dotayar ise zo askedayar.

Koe Warendorf wida koe Westfallen, kota yasa va xetum kum inta is dem koridafa kepaita aname lird dadir. Irubasik koe monapa dem divef sekol (roneon) blid. Lopinaf vegeduks (talteon) va jaftolxe ik baplahe ik onya zanudad. Ivamufe olkxe dem rolizina kepaita (kadimeon) va werdol nendad.



Aloyayana div intaf tawek, bata tawadayikafa yasa va kona wida artlanir. Widik kadime okilik va sint al kabelcad ise va warzaf artlanisik dizved. Ede va sint tannugon dotrakad, pune sin di zo emuded voxen parmafa dostegara arti tanda oxam gruyenon sokitir.



Koe nartafo gazaxo, porma tiyir aultovesa is gedrafa. Tawoldaf trig pufon zikayen (1), is galema ton opelaf tazuk (2), is iyekotafa sarma kobureyena mal yona coyunta ke Mediterranea bira. Porma kum inta tiyir yavapafa : recia (4) is muktü dem azilaf is iyekotaf ziradey (5).



Koe bate widafe intaxe, mek nikoy vols tanoya bontapa tid. Teyak vakrileon tigr, moe sid : bata pakaya ke olkoba va burmotaxo is estuxo zanudar. Exomafa tegira dum layera koeon dere zo ksuber. Yasa koe ban lik ke bonta keniber.

Fortunat ezlopik va tayaxo ke Nicetius tujradik ke Trier al pimtar inde ino bak VI-eafa decemda tiyir. Tigiso koe Mediolanus koe lan gonoy ke Mosel kuksa, vawale abrotcafa rebava dem bar-sanoy rasek tir. Kolanisa za gan tanoy rasek is abdimimasiko zo rojur. Lavarn pokeon guyunder. Bermapa ke tujradik tice bria zo kolnayar. Taya is centaxo is iltaalxo ton vegem moe dataca tid.





Wid is widavik

Bal tolgenirapa, loa widava tiyisa intotuca ke Taltekafo Romafo Gazaxo gan nartik to levrotd. Zo guined voxe me zo vilad. Volson mali zabdura va intafo gazaxo, lan nartik va widavafa blira toz albad. Tula jontikviele tir ke gazik kiblayas va savsaf romaf wid wetce kelu. *Ostergothen* Theodoricus gazik koe Ravenna va int inkeyer ; *Westgothen* Alaric koe Tolosa ; *Burgunden* Gondebald koe Lyon is Genève ; *Franken* Clovis koe Paris ; isen *Vandalen* Genserik koe Carthago.


Tode widawa va gazafo sokexo me zanudar, pune intafa ristusa zolonuca joke alkafa yorda wetce tujradaf widot titfir. Volson wan tir skapaf av gutrigayan gan jontik dolekik isu yambudik.

Icde jontika kerdela, wid ke narfata Talteka tid
 nemon amidaf gu tena ke romafe sare : va
 zovdom ton rontagentimaf nudeem is vigeem is
 moneem is grokeem is migexeem tire vided, voxis
 diveon vaweem is lavanarilteem is gasteem is
 naboxaxeeem. Jontika sanegafa cugexa laped.
 Lana gan gazik ik tujradik zo dimempad ise zo
 kiewagid ise va xantafa yorda vided : batinde koe
 Paris is Soissons is Roma is Ravenna is berma is
 wevala is kolavaxe is tciumba. Voxen ara cugexa
 rawawed oke gu aryona yazgara zo vankolad, i
 tulon lana wideytafa abala artazukana gu uja.
 Canefa revava dile zo jovled, dum tulon koe
 Milano. Volson, ara revava kan vegedura va
 loloon jontikafa uja kotron zo tuwarzad.

Moe bareaf vegem ke savafo galliaromafo bedablo ke Angers, Beppolène dacik is nik tcunked. Vere azeba besanafa gu tawoldaf klor laizon empawer, vibayana gan tandeem. Guto is porma is ganenik ko fenkune fe zo titosiped. Beppolène gan toloy dositik nemon zo vebidur.



Bata sokexofa revava ke Milano pakon jovleyena bal nartafa tolgenirapa gire zo kereler. Monaja moe xo ke savsafo kulafo yasaxo dem ware trilnaf brivatum su zo kolnayad. Savsafo impluvium drimula ke mona va ulidinarak mu bonoleem re zanudar. Matela al zo komidur. Widava va darefa wafuca al drasur. Arteon, lana savsavafa dopewa re artazukayana gu uja wan ranyer.



Levi *Pasca* alkajora, tujradik va jontika ailkera su fiptar. Ezgaldayap dem ailkenik ton ebeltagem kadime gertikeem va ailkeke bulur. Van wevala lanir lize va mista di tcoker aze taneatomon di tinefkar. Sedme *Merovingen* orpa, idja ke wid vas toleafa wevaluja (roneon) is tujradikafa berma is aryona uja isu tucpastaxe ruldayar.

Kurenikya ke Rauching dacik tir ton oklafa laniga viele koo vawila ke Soissons gozar, fuzodenon gan suesik. Va gamiafa moavafa roga dem ksevafa aka tiskir. Wast kum gemaf felt is moavukafa dilgava ke okol gan kurenikye zo firviyir. Oluikya is zanisikye va dolexo tigisa tite savsafo galliaromafa migexa pokolakid.





Koe yambudikafa revava

Dum abdion bak Romugal, yambudik va eba bas rictulaf feliik raved : tulon Eloï tumtik koe Limoges bas Abbo rogopik is taliasik.

Rogopik is taliasik is ilbodesik is layesik is myotnyofasik is milostiasik ikz- va onya idjon ice widava poke dolta ke dolekik dadid kire va abica runda olegad. Volson cade ke tawoldiasik is norkiasik is mikiyasik is jesik va dilgava ik iyekot is triviasik voxis onya ke intanyofasik is niskanyofasik koe gasta zo inkeyed.

Lan tuaptapan yambudik olegason dure liziwed : i tulon bitcopik is lenopasik is vegedurofik voxis intanyofasik grudimempas va yaxay kum inta. Ar yambudik widawidon gikoyad : tulon glotcas rogopik dimempas va imizxa is xeka is roga is yantafa sarma.

Jadion yambudikany tid riaf numen tel lostinaf sumupon zo vanimpad : kijasik is rentasik is iasik va lexasiki is triviasik voxis matelasik is burmo-tasik is begiasik ik selaropik.

Lan yambudik tid nuyik ise va exava koe widava ok widega ok logijafa wida ebud. Ar mialanuyaf ok levetiraf mu kon feliik kobad. Ta oksifa warzera isu yantanyofarafa, koe onya gubeon tigisa koe suptafo indxopo oku ujafo lotode zo lospayad.

Koe Huy kene Maas bost, yambudikafa revava arte widega tigr. Talteon tawoldasik va kuritcaf trig kan anamuckesiko asketcar. Viaro gan pomasik zo mallizir. Trig koe batmane cade zo burmed. Teni burmera, vimava zo empar nume va cadecek dem tawoldafa sarma tunuyar. Roneon iyekotiasik va suksesiki godjon tegirar enide va jera va yanta rundayana koe tawafi suksesiki di seotar. Pomasik va kuritca aotceyena gu okologola ta tololkotcafi cupasiki rutuler. Batak is banak kan teza kum inta ok yanta zo rubiad, i kan teza ke muka djukawarzena kum iyekot. Cupasiki abdi favera zo goturodar.



Roneon rogopik va caxafa gamdama malgabeyena kou moavaf toaz gwetason ziker. Va tolaskin fum kan iyekotafa gretcayana simba rubiar. Talteon, ar rogopik va cualaks keve gerga delar. Gemaf fum kum mucugayan moavafem moe welma ke roga kankum cwek zo giskid, is milinde vopelolk ke delaks. Adraf idul kan baponaf uul ke intadaxa tegirana kan colkay zo seotar.




Iyekotnyofasik va kuritcafi cupasiki al kotawar enide sini bal aynara me di roidad. Kan nubelt kum inta, va vuka kou cade abdinarir aze va jewesa yanta ko cupasiki gimar, nekison va yozdatum.



Kuritcafi cupasiki tir ware idularsafi viele gan iyekotnyofasik zo divtawar. Bantan va ini arber numen gerga kum yozdas iyekot zo tunuyar. Tenutcera va roga wan tir, rucason va tazukaweyes yantaf veel.

Nartafa roga kan tolloye ckane zo epud. Taneafe tir « nikoyara ». Goyunkena welma gu delayan yantaf nikoy zo besar. Vawale nikoyaks, pozlama kum wikoba ok ksewayana triva (2, 3, 5, 6, 8, 10, 11) zo deraykad. Kare toleafe ckane, delayan olkaf borey zo faved liz jonksewafa aka (1, 4) zo deraykad. Moava ok kotrafa dilgava ko cupasiki (7) volson zo aynad ise gu wikoba (9, 12) jontiktode zo tukotrad. Roga ton tazuk ke sulem : kiiz (3) ok taka ke flawezinda (12) ok rostaza dem toloya taka (5) ok kabay (8). Ayafa vola tid riafa ise va lesay ke Kristos (9) lotode kaatoed.





Glotcasik is yantakoarugasik

Ke teyopeem ksubeyen koe nartafa Talteka, to yantafa yambuduca lozulton nageweyer. Voldum tawoldiara ok triviara, nyofara va delana is gwetana is cupana yanta (moava is dilgava is iyekot) lidekson dun epur, vox kare cava is griva ke kote sare. Wori banugale to azilnyofara va metumiltana kotunuca artfir, ton tulon warzera va *Damas* azaka (ton randesa keska) is yantakoarugana muka (dem dilgavaf ok zingellutaf fem).

Cadekama poke azilxo ixam saveyeno bak Savsugal dum koe Rheinland gola oku Lorraine loviele zo inked. Wori vegunguca ke aala tir vrebafa kiren artazukara va kawot gu azil, va tokodapa ke inta olegar. Seotatason va fostula kum zijnaf azil ok azaka pilkovon favena ta iara va muka kum delayana *Damas* azaka, malseotayana yanta jontikedje zo goglotcar.

Bata fostula kal glotcaxo inkeyeno koe gasta ke widava ok indxopo zo vanlizuked : banlize lokiewaf glotcasik va dugafa imizxa is delafa xeka epud, lickon videson va birgeem ke intafa yamba.

Yantakoarugaropa ko Talteka gan ronekaf yambudik zo amuzer ise va titickafa inkera me olegar. Valey bagaf xekeem is abic tervansaf ugot (dilgavaf toaz is dilgavaf fem isu zingellutaf), yantakoarugasik va azilafa olkotca tugadiayana koe glotcaxe is ziketena doon rodiburer : ziradey ke anamba is wastasa dokaca is orilna.

Koe bate glotcaxe, yambudik va birgeem ta iara va dug en gruped, i va dug dem *Damas* imiz tis lokotgrupaf gu deluca is zikexa. Roneon toloy dodelik va *Damas* obla kan kurt mucugad , i va obla dem konak imiz kum zijnaf azil is azaka goatenon delayan. Talteon moe kreyta, glotcas feliik va imiz ke dug poon myelgar. Ta wana ke glotcara, *Damas* obla is dugimiz koe ontinaf teyak fereon zo gotuidulad.




Delon fonsayana gu drima, lupaxa ke bato azilxo gan raporaf gum kotraf gu sum zo afiar. Kawodik nendan gu gom is leltafa nyonda vox ton lebaf kuloir kiren idul dur va pist kan skuma dilfud. Kawot ko edava zo vajar.



Radimida va conyeem ke zikexa kev azilafa olkotca al zovdar, pune koarugasik kan sadja gretcar. Va lutaf fem ko malseotayana bourga koarugar aze kan simba kum olgafa inta myelgar. Azon va tigaf dilgavaf toaz mo vlarafa welma pozlar.

Ugalap is grupaskirapa ta iara va dug dem Damas imiz tid adraf. Glotcasik va balemoy nok kum karaf azil (ton batake moe 1-e zovda) is baroy azakaf nok (ton ebelte) taneon krepkar. Azon idulon myelgason delar, ton tazuk ke obla krilafa vas mon 0.8 m- (2). Bata obla azon idulon zo mucugar abdida ton lujoraf driz gin zo myelgar. Glotcasik va baroya bata Damas obla (4) kevplekur ise va dugimiz vaf vas mon 0.4 cm- myelgason nyofar (5). Va azilafa gabexa plekur (6) aze delar (7). Imiz ke dug zo nirar aze ko akidafa kolavara zo perdoer : to oxam batviele koarugayana zikexa zo razdar, ton batakafa kseva ke azil is orikafa kseva ke azaka.



Cadekama vegeduyuna kum rapor gluyan kankum kuritca titkeve bria tigid. Roneon cade drumkapon guyunder. Intada az azilaf kawot remo ticef remak goatenon zo vajad. Anteyara kan suksesiki vakrileon zo tutegirar. Toloyi ari suksesiki tigisi moe sid, va turunkara va teyak tuke toloy trek tigis tite cade su zanudad. Talteon, baponafa bimkorafa yanta div cade zo maltiolter. Moion koe glotcaxe abrotcion zo nyofar enide dugaf azil di zo malseotar.





Raporxo is pradjapa


Prostewa ke pulukaf veveduropik koe nartafa gazaxo ke Italia is Gallia is Espana is Lentefa Afrika wan tid blifa. Alkafa cugexa jontikote banugale kolnana tid lokiewafa yunkera.

Dum teni romugal, rebava ton « deme » zo vevedud, trabe ton jolama deraykana ton belafu cofu. Tawolda ta zikera va divak ke kolna jontiktode zo faver. Trilna ta briva is teyel is fremay ke rebava is sid is alkaf lukidoy wan zo kaaneyar : savsavafi trilnaki jontiktode gin zo faved voxisen lokiewafo raporxo ke Italia ok Pirineos meftava gin zo saved. Uja gu pij kum inta ok lodopelon renta giskisa va kepaita zo gibesad : kare toda renta tir kum mikiya ok digaf ok lutaf toaz. Bitcxa is lenopa gan yambudik male Ronekafo Romafo Gindaxo jontiktode zo epud.

Koe leon turomayana gola ke nartafa Europa, koe tulon Engla is Germana, voxis koe tawaday kulaf gu aala, inta va rapor wetce vevedus ugot cugtode ikaplekur. Ta kolnara va vesk lidam tapegafo sersikafo sokexo ok uja dere zo mal-saver. Intanyofara kotunon zo feliler.

Laptera ke savsavafa orpa va kotawara va awalkik koe elji, ware vonewesa bak nartafe sare, va tegira ke trilnaxo is raporxo dere dezuyur. Koe gola ke Paris, ta enkafa warzera va cupayani elji, giroda gu rapor zo ikaplekuyur.

Mone awalkixopo aname Sainte-Croix-et-Saint-Vincent uja koe Paris, yambudik va girodafi elji enkon epud. Kan jontolafa yomba kum azeb cupad. Arti konaka turodasa safta koe glesta, blet zo rorembured aze zo rofaved. Kadimeon, edava va ripey mal vegungafo raporxo vanbured : moe teyap tugirodatason zo burmer.



Tuke cupasiki kum inta, azekafa kuritcafa norka kotote tid vas millumafa. Tan azeb ke xuta tir dem gretcayana zikexa ingatasa va sinafa kadoma. Radimi turodara, norka is mikiya koe cade zo burmed.



Koe tano batakatrilnafo raporxo koe Pirineos jaka, bat raporilbodesik va tazuk is zikexa ke teyel martigon gu Korinthos remgudar. Kadimeon, rapornyofasik va trilnaki ton azazaf badatum celkad ; batcoba va avlakafa liota ke ilbodexo nekir.



Rapornyofasik ke Arcy-sur-Cure moe truj tigid ise va bolcekorafa kalkafa elega kan dzaga anamezad lizu kumon blet ke elji di zo ilboder. Kan simba kum inta perdoena num adeetes, va raporafa flava gu ilboden redjel ke raporxo iliksantud. Blagayana azenta va kildera ke elega kal sid nover lize ina ditzo zo tuvlardar.

Vegedura va intaxe koe bata Englasachsen wida zo tenuker. Tan rentasik va empur solgabeyar. Ar va otsa ke gamiafa olkotca kum inta kan stuka ilboder. Kore renta men tir tenukeyena, pune dodelik va azeba toz aykad ise va rebaveem kum drimacku toz ksead. Kepaita gu korid zo besatar.





Dolekik is doltik

Ware tegisa koe widava, kaza koe tawaday al kastaweper. Indxopo lotode va int staped nume va anton abica slikaca ko vegungafa widava isu wida wan doled : i va zaipa is rostela is ilt is centeda is kolt is ciastoa ikz-.


Volson, wemtafa kazara va tapegaf warzeks kal solumapa zo skur. Ronekaf dolekik va vodapaf warzeks loote tid : i va divepatectaf ilt is tciamaf lay is kofiga is roga is yantafa pormanya ikz-. Tid lanaf da va lustesik dene intaf anelikeem dem yon decitoy gogolkirik di trasid : i dem gazik is aboyikeem is pilkotapak is gertapak is tucpastaxe.

Moi divtotara, tciamaf doleks koe *cellarius* glesta ke molt zo abdaraykad, i koe tece liomxe lize koaykakik va koburesu grastu abdinarid.

Doleks pu doltik elupkon sokes koe widava is avlemodaf dolekik auzus va berma is kazaxo ke Talteka (Saint-Denis is Arles is Köln is Pavia ikz-) azon zo walmuned.

Levetirikafa kaza tir lion nyebafa. Dalon gestuna gan Engla is lentekaf coyunteem, va indxopo gu kobasik vaneksar. Moava turiawer. Nartaf nafalik va antoka ke taliara banugale mea tikid : ina pu aptaf yambudik dere rotis rogopik zo odia. Wori talafa pridura adre loloon kastawer. Warkuca ke zolonikeem boansas va kulaca tir tani nekipi ke skapafa milera ke nartaf gazaxoeem.

Kapaxo ke Saint-Denis mali ixam konak viel kotron dilizer. Gan tucpastik ke eceyxe kotilanon zo grustar. Sin va centeda radimi centewarolara is warzeyen kolt doled. Lustesik moe vorak debanyer ise va centeda yoyar aze va dro parloer. Avlemodaf dolekik jontikote tid.



Moe bat etol ke Ostia mone Roma, lan dolekik va jotafa Berber levetirikya pu kasaf lustesik atoer. Ina dum dositiktum koe lentefa Afrika zo gralomeyer aze kan tota ko Italia zo stayar lize anelik tigid.




Radimi parloerapa, iksesik is dolekik icde dro ke myotxatum va sint dotrakad. Leve obrasa ita ke dolesik, lustesik va aldo ke tal vadjes va tuseylamba itaya kan sespama ageltar enide di gruper kase voda tir tageltafa.



Taliasik va moavafi anamkuri mo titickafa simba (abduak) aykar aze va rolizina simba (radimak) moon rundar liz vordavapason myelgar. Batkane va fum gretcayan keve yantafa simba mo lenteem ke talolk fetinteon rubiar. Pomasik va moavafa fostulama cupar.

Koe Marseille, revava dem ronekaf dolekik dun blizeper. Koe nuda vamoe molt, dolta ke ellasaf ok yudaf ok suriaf dolekik tid kotrafa gu gedraf warzeks divtotayan gu Asia is Afrika : i gu tciamañ lay is leltxa biayana gu rolma is riafa myotxa is ksevafo roga is krafolma kum eluvaxa is trivafa fedja kotrafa gu gamiafa kofiga is rumela dem krubepunta is vaalka dem vor ke Byzantion is awolba is kemke is agzone ikz-.





Moo vawa is bost

Benele ke vawaf gort senuyun gan romik koe Talteka wan lapter. Soe bate levedre webeyese va triguca ke savsaf winkeem ke gindaxo al rayoligapar. Jontika za al griawid ise gu loxokagaf vegeduks kum inta ok totafa za ok kuja zo ika-plekuyud. Re voa moo klape jontiktode zo rem-lakid. Vawa zo kiewaginsid nume va muta me acagid. Batdume pridura zo tuviapar. Lan okollakisik va 45 ik 75 decitmetre vieleon wan rotexuled voxe irem va anton 30 ik 35 decitmetre vieleon rozomed. Ostik, koyasik gan budera va jowa jontikviele zo azavzad ike gan gazaf detik vrebond zo joxad : tire nafalik va grastu icde kot kopatectan doleks abdinariid voxe va koyutena erba gu kiewagira va vaweem me vankolad...

Ant sokazanisik dadis va winugaf ronokucilodas valdig va brutaf erod ke okolafe ledungxe belundad ise va volseitafa eda is iewaf okol rodadid.

Kotar koyasik (dolekamik is befoltik is korik) arpumason is iyelon gilanid oke gilakid ise gan fuzodesik rojus gu jontik drendik vugviele zo dositad. Lokulaf korik koe erodafo diremuko pridud. Jontiktan va balemkrafolafa ok tol-krafolafa edava impokana gan okol faved.

Xokaguca is volmusuca ke vawaf gort va loloon nobafa savera va bostafa kazara tukuvar. Lapisik is doleks va abrotcaf is nilaf riulk zanudad, i va tota moolapisa va Rhein bost iku Mosel iku Seine iku Rhône.

Savsafa romafa vawa zo kiewagijir numen moolapira bak fentugal tir voldrikafa. Gamiafa jaftolafa eda (*carruca*) ke bat zirsesiktum koe diblay ke suyaf zavelt tigur. Gan meobras bagaf irem impokan gan balemoy okol (*rheda*) kaliapon lakis zo nostar. Toloy flibik moe okol zdarion me al rovomangid nume zo bediblad.



Tumtaxo ke awalkexaf misraf Menas tumtik koe Karm-Abu-Mina pokeon tigr. To tena ke koyarapa ke bat Franken befoltiktum tir. Va Marseille taneon al artlanid aze va Iskandarya kan tota al kallapid aze remi konak viel koo letaxo tere al lanid.



Taliasik va moavafi anamkuri mo titickafa simba (abduak) aykar aze va rolizina simba (radimak) moon rundar liz vordavapason myelgar. Batkane va fum gretcayan keve yantafa simba mo lenteem ke talolk fetinteon rubiar. Pomasik va moavafa fostulama cupar.



Katitlapison va Rhône bost, bat walzaf totuk (linter) wison gu Arles widava tigr. Totaza novesa va remlakira va bost golde salt isteon su zo fenkur enide totuk di roremlapir. Moion, za gin zo buder, kan wazdel impokan va otseem gan okol volken bost.

Divulafa teremta va Garonne bost kenolakir ! Rembureteson va tuksa is kaip ke intafa ervolia, Gondovald va cwol vols okol ok astokol vidur ! Bat divulgaf sulem mal lentefa Afrika kan tota zo kobureyed ; nijud keskotapaf impokas bonol.





Moe bira



Radimi Tolgenirapugal, bira lion dam teni ke Romugal zo nobad. Nekev tcordik is bopelawera, wan tid musafa loon dam tadavafa vawa.

Mediterranea bira gan kazatota keno krimta zo moolapir, i gan tota dure treskasa wale Roneka is Talteka, bureson va doleks is lapisik. Ropiilatason va tota, ellasaf parloesik isu misraf isu yudaf isu suriaf, va dorjesik ke Aleksandreia jontikviele vidud aze va kametcapa fuzodena gan toteem ke Byzantion tazukad. Yultxo ke tota tid kotrafo gu gedrapaf arsay : denta is punta is vor is ilt is awolba is eluva vaxis tapegaf warzeks dum tayi is roga is yantafa porma. Bat doleks ko zolonaf molt ke taltekafa Mediterranea zo divtotad : ko Carthago is Ostia (poke Roma) is Marseille is Fos ok Narbonne. Vajayanon gu levetirik is tayi is myot is ervo is kawot dum vopel ok dilgava, is inta is zaipa is vor is sebeka is bonol, tota va batyon molt mallapid.

Mon alubka wali Narbonne is Carthago tir adrafa, isen tanoy aksat mali Marseille kali Aleksandreia.


Atlantika welfa is Manche bira isu North va bata noafa birafa tegira dere wid. Skeda wal Espana is Gallia is britanafa tursia is lentefa Europa jontikote tid. Molt ke Bordeaux isu Nantes isu Rouen isu Quentovic (mone Etaples) isu Dorestad (koe Nederlanda) va warzeks ke Mediterranea bira banliz vanlizukeyen moo tadavafa ok bostafa vawa divbured, is warzeks ke Gallia. Friesen saneik isu Sachsen tid donaf totasik is dolekik nume vanpid felisik va Manche bira isu North.

Vajarsayana gu bustafa denta is vaalka kotrafa gu violt, bata tota va laizaf zivotc acaginsir. Laveruult konid : birelik va lejasiko koe yultxo giopon tiud voxen madagitis gemelt tir gaversaf. Bopelawera me zo rotaruter kore vadjuk ke molt ke Fos drumeon tigid.



▲ Bata tota kare « keve dreuk » ckane zo vege-
duyur. Rentasik va dreuk (olkotca kum inta ton
tazuk ke U) moe gli kan azilaf fokev taneon al
titickad. Azon va azeb ke cewa (almukoteem)
ben bate dre al belced, i va almukot domadomon
seden gu tarida is cepta. Kota olkotca kum inta ke
lerdoy amidaf aal kan stuka zo ilbodeyed aze kan
landesiki zo tugemayad ise kan grunseda zo
remruyud.

► Abrotce ke tota kosmayan grocelon ice Fos-sur-
Mer vas 15 ik 18 metre zo uldiner, isen mante vas
cugon 6 metre isen ontime ke yultxo vas mon 2
metre. Ceke ke wazafa cewa tiyir vas 50 decitor.
Lejasiko koe yultxo va divbulura va lava kan
leltafa limega gluyayana gu wazdel kolizin gan
sotola noveyer. Limega koe toloya akinta kum inta
skodayad. Tota gan lujoraf ital zo liziyyir, i va ital
rovodjun is rovonen kan noxodasiki ke trabong is
wazdelos. Kan toloy krilaf boweroy tazukaf gu
leakom zo dirgayar.



Ital kan noxodasiki ke trabong tigisi
kene norik zo ticapter ; tevoy vizom
gis va trabong male ke ticefa ruza ke
noxodasiki tid.



Levi Mialukugal

Sare ke nartaf gazaxoem gu « orikaf decemdatum » jontikedje zo duvuyur, kevuson gu tele ke « Carolus Dimblirugal ». Enwe, sedielaf Carolus seltay (isti VIII-eafa decemda tici X-eafa decemda) jontikinde tir vey « romagermanaf » seltay ke nartugal.

Franken gindaxo tanafo is pofu loon dam abdion, va lok ke Europa re felir. Gor ke olgalicura al tir inafa crakefa gamiafa okolervolia. Pelava gazon gu Carolus Magnus artfir ise male lentefa arabafa Espana is *Langobarden* Italia kal *Sachsen* gola is Rhein bost divlizer. Ino va ironokafa tolgenira (tela ke *Viking* sane isu *Magyar*) go-lentegir ise va *Sachsen* saneik isu *Slava* isu *Avar* isu *Langobarden* isu *Araba* gokevgir. Indxopo lokiewon zo pofad ise va ckanefa tuwarzara belundad.

Taneafa veveduna ralma va gijarotiuca is volruptesuca ke pilkotik tove soka ruyed, milinde vonera va gejafi is skapafi tiki ke lantel tove artel. Batkane jiomafa vertuma adalatasa va jiomafa tamava remblir.

« Carolus Dimblirugal » dene to arayaf is yambaf ind taneon exaksaweyer. Opafa vayara isu suterotafa popon vonewed, pilkovon koe tucpastaxe lize trak ke pulukaf sutesik gin zo kosmar edje bema jonkawed. Balumara is bitcopa is lenopa is rogopa is wulanyofara is moekote ewavan nubasuteks tid loduiveaf vrutasik va yambafa tuwarzara : turestara male *Byzantion* tamava isu *Englasachsen* gu setikera va pulukafa yamba va int loplekud.


Carolus Magnus tir dim tana gelukafa berma, koe Ingelheim poka Rhein bost. Dositanon gan aboyik, va mialon ivamuf poraf kuskap kolanir. In vawale tristtum dem isteon lird tigr. Kolneem tid kum rapor dem cofu kum norka.



Lima moo vawa vane kotgrupafe eceyxe ke Sankt-Gall koe Swiza remlakir. Gan okol kan epitaflek mesuganon zo impar. In va laridaflek telomtas va bonol tod gamiarsaf vaj ikaplekur. Tawadayik va taya kan ziita dem azilafa loyta is krafoltum ziar. Batu midu tir keskotafu loon dam savsaf dezark dem loyta koninsisa va tawa.

Vajikera ke Franken okolervolia tid crakefa numen awalkoda ke Sarrasin gejik va azeka ke Poitiers vilunded. Keskoton nendan gu leltor is atsa is anamkaf prosil, okollakisik va gamiaf dug is kaba is dile tra ervokiron dadid. Tuke ontinaf milost is sudoteem, va tanta do okol bak vajikera tadled.

Volnafa ervolia vanlakir numen lamone va levgara va dilfura egadar. Sayakik mo ivamufa kijayana migexa galted. Iste bate anambe, tawafi tcakesi tir dem ticeon lujorafa trava kum inta lize digis biptik soker. Vansara tir kan za nendana gan drimaf rasekam.





Kotavaxak dem suterot

TARLESIKTUM KE BOUNTY TOTA

Jules Verne

Kotava, tela tamefa golerava

Berpotam (1879)

I : Divgira

Darekeon. Meka sukara, mek ploz lavekon ice bire, mek rujod koe kelt. Wafaf bitejeem ke geepozacku ton medowina karuca zovdawed. Italeem ke Bounty tit norisk rumkawed, tota tir yalestafa, ise taelafi, tuzwawesi keve vanawaltara, va dark kan merogotuna afida koafiar.

Bounty, tota dem klite vas tol-decem-san-aluboy decitor is drig vas balem-san-tevoy ayik, va Spithead ba 23/12/1787 al bulur, dirganon gan Bligh redakik, i gan bagalakiraf vox figapaf totasik dositayas va Cook redakik remi inafa ironokafa vestasa koyara.

Bounty al zo vuidar enide va galketa atripisa moe Tahiti tursia ko Antilla di remburer. Kaiki tevaksatafa vurjara koe Matavai ceda, William Bligh, vajayan va decitoy bat aal, van Talteindia Tursia lapir, moi jonvielerama koe Tonga ewaleem.

Jontikviele, uclesafa is perlesafa anda ke redakik va volplinafa nyalera wal in is konak fayik al daskir. Wori, auluca tisa dene Bounty, ba ticawaltara ke 28/04/1789, va astirbaf sokitis bifeem mekon abditar.

Tire, kotcoba nutir vumeltafa, viele rustolafa tegulara moe tota laizon galbuwer. Konak birelik va sint domud, va abica ewa omapudon dokalid, aze boramon griawid.

Kas gazdafu vielamu zo ikabetar ? Kas kona brugafa walta dene tota al sokir ?

— Moekote va meka lorara, nik, ~ Fletcher Christian toleafayik ke Bounty kalir. ~ Bob, va rinafa westa ervoal, voxen ba jinafa kobenplekura anton viltal, xay !! Rin, Churchill, va kufta naril aze va ludot ke ilpega ke redakik fu arbel. Va ironokafa juikera : va in blis kuraní !!

Do mon sanoy kadimelanis birelik ervokiraf gu abalt ok wedok ok westa, Christian ko azebacku anjer ; azon, rundayason va toloy susik kabdue ilpega ke Stewart is Peter Heywood, i ke drigokilik ke Bounty isu midshipman fayik, lent tuvel ke redakik vukir.

— Tetce, fanik, ~ kalir, ~ va epitarapa !

Kev xuvararsa tuvel haar, nume birelik ko ilpega iped.

Taneon akoyen gan tapeduca, is rotir undeson va astirbuca ke intafa tegira, abicedje klabumud.

— Xolo ! tokcoba sokir ? Toktel rove... ? ~ grableson tit xuta redakik diviegar.

— Amlital, Bligh !! ~ Churchill dulzer. ~ Amlital, ise me lagacagil, oke va rin naroté !!

— Va int me rovovagel, ~ Bob dakir. ~ Va volacka soe neditil, viele ben trabong ke vadimenorisk zo rumkatal !

— Va inaf nubeem kadim ge vaniksantul, Churchill, ~ Christian kalir, ~ aze mo azeba ticburel !!

— Tel lodeaftaf redakik tir crakensef, viele grunartet, ~ John Smith katcalar, i trakopik ke blay.

Azon teixa, me dwison va rotir divmodara va birelikeem ke ironokafu vielamu wan kenibesu, va fogelom ticlanir aze mo azeba tolawir.

Batcoba tir tarleracka. Tanoy totafayik, Young, tan midshipman, va int gu tarlesiktum al zogether.

Luxe drigikeem, klabusik gemelton al xaad, solve ar olkoy, ervoiskaf is okiliskaf, zavzad tcokes va lenteon fu dilizesa piza.

Kottan moe azeba tigrir, emon is amlitas ; sin va tila ke redakik dizved, i ke dan ackuon lebaft ist batyon ayik giskotcas lente int takamadason abdulanir.

— Bligh, ~ Christian kalir, kan figafa puda, ~ gu rinafa dirgara zo basflil.

— Pu rin me kagrupé, va roka va ... ~ redakik dulzer.

— Golde mefakafa kevotcera me aeskev !! ~ Christian diviegar, waljoason va Bligh. ~ Batedje, ti remgrupesik ke kotaf drig ke Bounty. Koe Engla ware tigiyyit, voxen va rinyona lutsagasa uculera iku fikafa diotetca i xam gonotemeyev. Viele kali « cin », va fayik lidam birelik torigí. Osk va cinafa gonina keldaskira meviele al lajuseotav, voxosk va cinyona temera kotviele vliguson al kerekta ! Kas kle tiv vakol, kotviele lutsagan ? Sanejik, drendik, rotuxasik, dubiesik ! va man ponsaf muxaks, i va leyoromafa lutsagara va cin me dikiyil ! Arse, tok ayik va oltavafa tira co rotcizar ! Isen va jin, i va rinaf milgugik, va jin grupes va rinafa yasa, va jin tolon i xam koyayas leve rinafa dirgara, kas va jin al umbel ? Kas va jin me al kagal, ware arinton, da va konak kimtaf ilt co dubieyé ? Ise va drigikeem ! Golde vugcoba, ko busum ! Golde grewej, va tol-san-balemoya vordava kan wazdel ! Kle, kotcoba dene bata tamava zo kaldoder ! Tove cin al til mantukarsaf, Bligh ! To rinaf siluk ! Va rinyona lutsagara, i va rinyona memalyaca, i va rinyona volpestorafa buntura, i va rinyona lidafa is altokafa nakera moanzayasa va drig mali tanoya tanda is lik, va sina olgon fu vugdall ! Redakik, gan rinyon kantarik al zo malyel nume zo lanzal. Kas batcoba en tir, palikeem ?

— En, gue, va xonuka ! ~ lo birelik diviegar, dratceson va redakik.

— Bligh redakik, ~ Christian dakir, ~ konaktel al rietad da art wazdel wal kelt is lava di zo rumkal. Artel draged da rinaf epiteem kan lerdaultafa usta di zo sollipar, kali sokitisa awalkera. Gestensed. Loeke al trasí. Ostik, me til antaf gunik batlize. Yontel sagon skuyus va rinyona benplekura, i va dace udutapafa, levplekunon gu jinafa dirgara zo co gripokoled. Al riwed da va rin fu dositad betliz suka va win vanplatitir. Likay zo vanstar !!

Volvanovasa prejara va batyona ironokafa ewa ke Christian emuder, voxen in me nudwir. Bligh redakik, me nuskalten gan bata dratcera, va amlitam impavantar nume kopulvir.


TARLESIKTUM KE BOUNTY TOTA

— Fayik is birelik, ~ acon kalir, ~ wetce fayik ke gazafa totervolia, dirgas va Bounty, va winafa djuskuna askipera va jin kevotcé. Ede va jinafa askiyina dirgarinda koninde djutemec, pune rotaskic da gan gejatregul di zo malyé. Voxe, ape, va astirbuca ke intafa djuprokoskuna tegira me al undec. Nubamadara kev redakik, batcoba tir tarlera kev drumkaf mweem, tir askira da kota dimlapira ko winafa guga vol titir, tir kuranira da wetce tozekik zo askipetec ! Waveon ok gaveon, titir krizafa awalkera, xonukera ke zatkik isu tcumivesik ! Yolton gu poruca is kovogayana vegea, gransé da va goni dimon kofic, xay !!

— Va jintuks en grupev, ~ Churchill dulzer.

— Pwox ! Pwox ! ~ drig iegar, djuprogalies.

— Battode, ~ Bligh kalir, ~ larde va kosik modinec, tití, vox ant jin ! Jinaf dositik, winon lanzan dum jin, va jinyona benplekura anton al skud !



Puda ke redakik gan taspusa dolpa bam zo besar, nume in koebgar da va batyona volsaayasa takra co rotuzar.

Batedje, sabegara ta malskura va benplekureem ke Christian su zo kotaskid.

Wori, blipafa atatcera, wal toleik is konak tarlesik djudivgis moe bira va Bligh redakik is inyon dositik zilison va meko ervo is iskeson va meki begki, al madawer.

Konaktel (isen tir boy ke Churchill) torigid da ota ke yontel gobulus va tota tir axarsafa. Va kot meurbeckeyes kir memusaf ayik godivkarled, ~ kalir. ~ Va yontel mekalnales va kotaskiyis bifeem me zinulad. Luxe in, golde yona ustara ekeyena yoke emdura koe Tahiti, inafe ge vaon wan rotur. Tel lokiewaf mergil ta fraskera, i tel lokaliaf, co tir da redakik taneon zo co zurter !... In va int co grujaxadackar, is kan intafa nuba !

— Hayward !! Hallett !! ~ Christian iegar, gukoeson va toloy fayik is menyurnason va katcalaks ke Churchill, ~ ko likay titlanic !!

— Va tokcoba pu rin al askí, Christian, dume va jin batinde askipel ? ~ Hayward kalir. ~ Van awalk staksel !

— Karidara tid mefakafa ! Vogel, oke edeme !!... Fryer, dere rundanyal !!

Voxen bat fayik va Bligh vanlanid lodame va int van likay vodjud, azen Fryer, nutis loon elvaf, van redakik xowar kalison :

— Redakik, va tota dimon lafeliat ? Va ervo me dadit, ageltafa, voxen bat tarlesik, fu akoyen, me di rotacagid. Ede konak min di zo aytat, rotaxe ! Lapodat !! Va tokcoba trakul ?

Ixam fayik sabegad nume va tarlesik divtristackas va likay djupromoebidud, viele Churchill, onseyes va bata nek kalifa dopulvira, do konak ervokirackaf ayik va sin anammadar, aze poason askir da rundanyad.

— Millward, Muspratt, Burkett is win, ~ Christian kalir gukoeson va konak birelik mepakeyes va tarlera, ~ ko azebacku titlanic, aze va intyona tciamaca narac !! Va Bligh redakik dositac. Rin, Morrison, va batyon fanik enintel !! Purcell, va rinaf intanyofasikaf kold naril, konové da divburel.

Toloy norisk dem sinaf italeem, is abica cepta, is tanoyi solgabeyasiki, is italstama vas tanoyu olkomacku, is lava vas decem-tol-san-aluboy inoc koe balemoy miluntam, is sma vas alub-sanoy livre aldolum, is bulolxa vas bar-sanoy livre aldolum, is tevoy kotraf xeynak, is kuldeeem ke redakik, batse kotcoba gan divginiktum zo ronosalburer. Toloy ok baroy guazaf abalt pu sin ison zo komimad, voxen kota viltaxinda zo kalvewar.

— Toklize Heywood is Stewart kle tigid ? ~ Bligh kalir moida koe likay su rundanyar. ~ Dere sin va jin al relmed ?

Me al relmed, voxen Christian al gorar da moe tota sur.

Bam redakik va burdafa is axafa vula dikir, i va rotixeckena is trelapafa.

— Christian, ~ kalir, ~ va rin bosá da va kotcoba dilizeyesa vulkutú, ede va rinaf relkaf azed ebgal ! Vosé, va jinaf kurenik isu yasa trakul !! Jin awalkeyes, tokcoba jinikeem vanpitir ?!

— Ede va abica poruca co diyil, ~ Christian dulzer, ~ arienta bateke me al co tir. Ede rin va rinaf kurenik iku yasa is kurenik is yasa ke artel loviele co trakuyul, pune co tiyil leeke olgaf, i leon volmayaf gu kot cin !

Ba rinaf siluk, bosco fayik, viele fu rundanyar, va Christian latukrenugar. Giopon.

— Jontikedje mejé, ~ bat in piron dulzer. ~ Me grupel va manyona nakera al eké ! Me ! Batcoba vielcekon loon me co dakiwer, ison, grupeckel da, remi varafa koyara, jin, toleik ke bata tota, bro vakol al zo askipé !Wori, divgison va Bligh redakik, ape jinon me tolwitin, saason djufiné da kota pokolera va giwara gu in me di zo deswar. Smith ! Ko ilpega ke redakik titlanil aze va inaf vageeem isu vuidirn isu pone isu vobor pu in burel !! Ison, jinyona totarawafra isu sextant gor pu in zo bulkad ! Batkane in va kona fala ta giwara va intyon dositik is int daditir !

Benplekura ke Christian zo skud, vox kevotcemenon.

— Re, Morrison, va ewalze monzel, ~ tutaneaweyes toleik iegar, ~ aze ko roti ke Lorik !!

TARLESIKTUM KE BOUNTY TOTA



Edje tarlesik, va Bligh redakik is inyon kimtaf dositik beanon vankieveson kiavad, pune Christian, altogis va kiwast, va illapis likay me rotilwir. Bat sintaaf fayik, dem linulara batvieli ronkafa is ronjafa, va siskera ke kot dirgayas redakik al riwer, kotvieli anton tir okilik ke tozekaf blay. Va guazafa gadikya is aguntanik is krimteem ke Man ewala, i ke guga, me ware ronowitir. Pester aytzun tit uldinera va int, i griporan dolge kottan ! Estera moi rolara ixam artfir !

II : Divginiktum

Dem san-anyustoy korik, i dem fayik is birelik, is abica ruldana eksa, likay bures va Bligh al zo vajapar eke ridafe ontime tir vas biwe san-aluboy *inch* lum. Dem abrotce vas tol-san-tanoy pied lum is mante vas tevoy, in ta zanok va Bounty tire katicikir ; voxen, ta dadira va maneke otaf drig, ta sopura va abrotcifa koyara, mana tota cugeke tir nararaja.

Birelik, dirnus va fa is deksuca ke Bligh redakik is yon milbalif fayik, godjon detced, nume likay kalion runtaludzer.

Bligh icde gononkana kiblara me al klabur. Taneon, sin va Tofua ewala wilurson gonodimplap, i va lovegungafa ke Tonga ewaleem buluyuna weti abic viel, nume va yone galkete is gire eksara gu lava di kayestad, aze, batlizu, van Tongatapu lapitid. Va yona bliga jontikote ronaritid, ta remlapira kal kono xollandafo exonexo ke Timor, larde kivason va patectolikeem, krimton ic jontika tursia ciaesa va kelda me djuvukir.

Taneaf vielcek regaliskon tiskir, azen miela toz dur viele krimta ke Tofua zo kosmar. Volfikunton, domega tir pistokkirafa is piluda gurapafa eke mielafa kallapira me zo royovar. Kle afiz zo goker.

Vaxe kalolegara, Bligh al gorar da sin va kona eksa ke likay me malnaritid. Acum ewala va inaf ayikeem is in gosinkar. Batcoba fu nutir wavdafa, lecen, taneon, moida moe siday tigid, va meka irubasa conyuta kazokeved. Wori konak ewalik fure nediwed, aze, askipeckeyen, va yonar vanstad. Bantan va abica lava is konake wageye di vanbured.

Tokte ke Bligh tir gijafe. Va tokcoba pu batyon patectolik mordayas do Bounty bak ironokafa vurjara gokalir ? Kotdroe, va ageltuca fiste gopreyutar enide va targuca batvieli anamfisa va kot diveik koe batyona tursia me vilar.

Kas sin gokalid da ta eksara gan tota zavzagisa moe grocela zo staksed ? Volrotisa, larde Bounty tota me tir rowina, dace ticu venta ! Kas gokalid da tota al bopelawer, nume patectolik va sin gu antaf moblisik co torigid ? Batcoba soe tir lodageltodafa kuda. Rotir, ina di konter, fu askir da sin va ekseem ke likay tukotrad. Bligh va bana nek wupesipisa kiblara kle gotur, nume va dositikeem walzer enide kottel icde bata kuda dotrakur.

Gildeson va bata nega, patectolik va meka daavaca meu nigerinda nedid. Gexata va akoydarapa anton muxad, numen grupera va sinafa trakura vol tir.

Remi tole ke alubeaksat, ota ke patectolik artlanis mal arak ke ewala dwison laumar, azen Bligh fure romalyedar da sinafa xialara tid plabafa. Konak va tota mo omega dace lanened, voxe kev votcukafa danedira ke redakik dratces kan wedok anton di dimelanid. Batedje, konak ayik ke Bligh, stakseyes ta lava, vas baroy gallon tokoda vaon vanbured.

Vula tir ta bulura va bata volluvedafa ewala. Ba titawaltara, kotcoba tir gadiafa, voxen rundanyara va likay tir wavdaca. Omega tir dem jontik patectolik walglas va bat rapor gu ban, djuprokevkbabus. Acum likay arte konak toise lum male domgozavzagir ise anton di vankrir viele ayik vere fu djuprorundanyackad.

Englik, en dwipis va plabafa xialara ke patectolikeem, va piluda dimon titlanid, vanmiaie tol-decemoy volnik anton kes va sugdava enide va sin di moebidud. Wori, kot sin va totama fikunton su rundanyad, viele tan birelik, yoltkiraf gu Bancroft, ta aneyara va kon vulkun plek mo piluda awalkedon dimpir. Bad tanoy verast, bat volproyik gan yon patectolik zo koanamar aze raporganon zo sagonder, teka dositik dadis va meka viltaxa rogreled. Ostik sin dere, batedje, zo dildud ise rapor moon lubeped.

— Tetce, fanik, ~ Bligh iegar, wiluon ben vingo, aze poon en detcec !!

Patectolik va bira bam kolanid ise va warzafa yeonotcara mo totama balied. Konak ayik zo bakad. Voxen Hayward va tan rapor lubeyes ko likay tredur aze va tan ruzadesik kulmer nume wal iteem uzackar. Patectolik kizoyupuson dimeluber isen englik kan xuri dulzed. Sinaf volfalaf palik zo jaxadar.

Wori, konaka guema mal omega abdulakid ise va sin tcabaned. Bata onkara ton doaliera anton rotenuwer. Doaliera tere co tir volfikuntafa, voxen drigokilik afion rieter. Me guzekason da va Hippomenes lyumas va Atalante milaskir, va int gu dirja nager aze ko bira mimar. Patectolik nyus va wivga ta izga, treduson aasked, nume bat paz nover da likay va ceduul kaiklapir.

Aze mielarsar, nume patectolik, divtakrelan, va onkara va likay jovled.

TARLESIKTUM KE BOUNTY TOTA

Bata taneafa lavankrira al tir volfikuntarsafa nume me zo tolaskitir ; boy ke redakik icle tickir man.

— Re gogorat, ~ in kalir. ~ Nakila su dilizesa moe Tofua, moe Tongatapu gire sokitir, arse, is kotliz djuvankritit. Abicote, a viltaxa, stopre yon patectolik en tigitit. Zelayanon gu moorteks, va bliga me rotikaseotat, ise pu int poason vol tiskat. Batdume gu intyon antaf rob zo kastat. Okie, grupec dum jin, nik, maneke sin tid kimtaf ! Voxen guon zo tuvaleat lodame ba kota vankrira va bli ke konak minik fu arpumat, me folic ? Wori, va kultuca ke minafa debala meinde djupalsé. Ta artlapira va Timor, va mon decit-tol-decemoy lieue solumolk goremigatat, ise gu sma vas tanoy once aldoolk is lava vas inocamu va int vieleon gokimatat ! Giwara mandroe anton tir, ison, kredason da kottel va jin kalvegeter. Memutceson dulzec !! Kas finec da di lasopuc ? Kas vogac da va beta benplekura ke jin di kovegetec ? Kas abdiplekuc da va int di levplekuc, meprejason kev bayona zelara ?

— En, gue, vogav ! ~ kan dofa puda dositik ke Bligh eviegad.

— Nik, ~ redakik dakir, ~ va intyona waldafa kiova isu riozaca isu bogara govulkut, va intyona ilkafa eksaca gu donaf veydulap ant gonyapes tanewon gowetat !

— Abdiplekuv.

— Ede bostarkac, ~ Bligh loplekur, ~ ise edevol, va win grupoatá, va giwara dulzoé.

Lapira van zo RLR- askir. Suka, pockafa, bak sielcek ke baleme ke alubeaksat toz kadar zivotc. Runta tupwertaweped eke totama walon griawir, ise nuvelar da me co rogepoyter. Wupe kovulon laumar. Perdoen is tuopran, kimtik, batvielon, va tanoy yeladabilagacek dem xeyna is tanoyu amu ke zaxaweckeyese galkete anton seotad enide tolpozilid.

Direvielon az remi konak viel, debala me betawer. Totama va jontika ewala wallapir, lizu konaka guema mallakid.


Kas batcoba tir ta tcabanera va ina, kas ta moorbera ? Golde etrakara, vukira co tir volproyaca. Batdume, likay, dem italeem deen gan sukaracka, va sina radimuon fure iskeper.

Ba larde ke alubeaksat, mayakafa xeftoara vinustar. Ediara is koafimara va sint dun radimifid. Muva poon luveper maneke tela lotizafa xeftoara koe minyona lidawicka vol koswavar. Turodara va vage vol rotir. Bligh, bam, rietar da vage ko lavok zo perdoed nume batkane gu eip zo plawuked enide va abic idul malnarin gan muvara di dead. Soe, bata soistafa muvara, kisa va jontika mejera gu redakik is dositikeem, va aryona lovirnafa nakera zawaled, i va nakera ke aelera co daskina gan tabin idulars.

Ba san-pere ke alubeaksat, gazdon, moi eaftafa xeftoara, temera tutanboyawed :

— Meinde va umo po ditit enide va New Holland di rotartlapitit, ~ kimtik diviegad. ~ Remrun gan muva, ciondan gan cu, kas konviele va tanoya tildera daditit ?! Riwe aelzertut, kas redakik va vace me fu laumasil ? Loxe kore minaf bligeem puskewer ! Artlapison va New Holland, va ikaplekuks drikon trasitit !

— Kevvewá, ~ Bligh dulzer. ~ Mana tegira co tir oviskafa. Benje ! Va sulumacku kal Australia



anton al remigat neken ixam zo divtakrelac ! Ostik, va bliga kene krimta ke New Holland drikon fotrasitic ?! Voxe va bata patecta is irubasikeem me grupec !

Azen Bligh va tuwava ke sid is lida ke patectolikeem duskon toz dalinger, i va gotisa dirnuransa va in, i va kotcoba taveyena gan Cook redakik remi intafa koyara. Gire ware, volfikuntaf dositikeem va in kalterektar nume stivawer.

San-aluboy azaf viel gan aftafa awaltara zo tuitupad, numen vage roturodawed. Ba tol-san-pere, uvendaxo kene ronefa krimta ke New Holland zo remigar. Bira kadime bata drakafa anamba tir vumeltafa, isen konaka ewala, dem divepatectafa aala, va disuk felbed.

Likay vankrir azen ayik xelkason abdulani. Icde jonvielera ke patectolik, va yono savsafo teyxo anton trasid. Kle moe siday va mielcekany fu rotiskid.

Voxe gonestud. Fikunton, tan birelik va orekafa priwa. Fariuranya di tir.

Direvielon, Bligh koe likay va tupwertasa trivaxa is yozdak is abica nula trasir. Batkane va tey ta burmera va wivga ik skaday rowarzer.

Bligh bam rietar da va drig gu baroya lospa solparsar : tanoya va kotcoba koe totama di govur ; ara toloya va bliga di gonaneyad. Voxen konak ayik piron temed, dakteson da abduabdad da me di estud lodame ko bata vema stuvon di gestad.

Tan sin, perlesaf ik ziadgas loon dam yonar palik, pu redakik dace kalir :


— Kon ayik va ar sovodar, numen me dosté dume kotviele co zavzal tildewes ! Ede ael, va kona sinka kevlanil !! Oye coba rinon askina batlize, ikarundackatá !

Tarlesiktum ke Bounty tota, ke Jules Verne (1^{-eafa} zixa is toza ; wana titisa koe diref otuk)


Tarlesiktum ke Bounty tota : berpotam (1879) ke Jules Verne francaf suterotik
 Xanto : *Les Révoltés de la Bounty* francavon, kalkotavayano gan Bruno Cordelier, 2013.
 Dotay : Kotavaxak dem Suterot.



ALTO KE OKOL




E OKOL






YUP KE OKOL




E OKOL






VILEEM KE OKOL



KE OKOL



lana dorora
ra.

Lupo

EN : **esophagus**
FR : **oesophage**

Narilt ka vabduefi ki ke logasa
pima, stas va blot kal uvoona.

Mayeda

EN : **trachea**
FR : **trachée**

Reltaf is fodaf narilt stas va gael
mal pezafa betsava kal rizeem.

Riz

EN : **lung**
FR : **poumon**

Gaelesa vila kum rotatcena
layta, tazukasa va tec eyelt liz
gael mal artafa betsava zo star.

Takra

EN : **heart**
FR : **coeur**

Reltafa vila sopusa va fortayafa
pridura.

stomach
estomac

logasa
y, emudesa

TELIZ

2^e bu : Blira sareon gu nartafo gazaxo.

54^e bu : Tarlesiktum ke Bounty tota, berpot.

62^e bu : Kotavexa : Okol.

68^e bu : Kuda ke Aisopos.

Kotavusa virda

Virda kotavon sanelayana, nuyon is faston romalvajana is rorubiana is rotanamzilina. Ickriluyun rokeem. PAG / DE.

Internetxo : www.europalingua.eu/KotavusaVirda

Bu : www.europalingua.eu/KotavusaVirda/24-e_otuk_10-2024

Sanegara : Saneaksat ke 2024. 24^e otuk.

Yunkexa is ewava : ewaveem abugaf gu roka ok nuyon rotamuzen ok rictayan gan digisik.

LIWOMBURA

Tula va olkoy ke lan liwatum watson gu alto. Konaka gokosmana peryasafa liwomba.

Xantaza :

<https://kotava1837481.wordpress.com/2018/08/26/7-familles-en-kotava/>

6

Loma
LIDAGULIK

NUYUCK



« Tank Man »
(?-1989)

« Tank Man », okon vuesten gu Megrupen Exaksasik, tir ayoltafe siniafe yikye. Bak imwugal ke 1989, jontika diliodafa exaksara koe Beijing koe Sinia dilized, tulon sopuna gan kotlaf jotikeem, ranketeson va avonara ke vertuma is imaxutuson va gaderopafa is sanerotifa fabdura. Ba 05/06/1989, rictaga va jontik bort mo Tiananmen Viga stakser. Sipuxa va ikpa Abdulapir viele antafe yikye dem batakap klaim is toloy eyelt vaon lentegir ise budar. Rujara va kunoy xonukesik di nekir, don ape «Tank Man».



Miwara va bata bifa koe Sinia wan zo biur

"Tank Man" stops the advance of a column of tanks on June 5 1989, in Beijing.
Photo by Jeff Widener.

Mahatma Gandhi - Nelson Mandela - Andrey Saxarov -
Martin Luther King - Rigoberta Menchú - Tank Man

Deaxolsusik is govitaf deaxoleem

Deaxolsusik, jupayas va deaxoleem ko baspexo, sonker da govitaf deaxol gu in al aotced, nume, ba siel ko arula va volant sin platir. Direvielon, xefto dupur. Acum larde me mo gubefo baspexo rostar, pune va sin koeon roper ; voxe va abic werdol gu digin deaxoleem anton zilir, biwe enide in me di aelawalker ; kevoke gu divef, in va vace tugijar enide dere di vanpilkar. Moi sazaj, ko mulexo va belcon sin jupar ; voxen govitaf deaxol ko meftava otced. Edje deaxolsusik va sin gu niauca kagar larde damo intafa manafa ropera batinde zo jovlé, sin rwoded aze dulzed : « Batdume, loeke, va rin budaxav ; kiren, larde va darevielaf emudenikeem lodam rinaf guazaf bonoleem al ropenyel, ede warzaf deaxol di pid, pune va cin joke ban sin arse frayetel. »

Bata kuda nedir da kievera va nuca ke kontan taneon krafias va noeltaf nik lodamu guazaf zo gonafanar.

Kuda ke Aisopos, -VI^eafa decemda (kalkotavaks gan Yurani Andergan)